



棠越鮑氏三族宗譜卷之一百八十九

奏疏

戶科給事中乞復宣大總督京師提督奏疏

鮑道明

行之三峯

戶科給事中鮑道明為乞復總督軍餉提督團營大臣以備簡任以預安攘事臣竊惟今之事勢患在□□內侵邊臣玩愒所望正紀綱明法令祛積弊而震之惟本兵實然其在外也則莫如總制二者得人□患不足平矣然才必預養而人貴兼收多方以求之設官以處之俾嘗試而預為之所然後可以必其成功不然備之不預臨事倉卒乃求祇見其艱耳臣嘗稽之往事驗之方來揆之今日人情事理蓋有見於總督提督之當設也何也既往之失將來之鑑與其當事而缺人無寧設官而不用為愈耳即如往歲宣府失事當其時總督既拏解矣邊事孔棘而主帥缺人可乎仰惟我皇上洞察機宜暫以侍郎張漢代之蓋權宜耳繼而簡自廷推則陝西都御史翁

萬達也萬達固南人耳其經歷邊務與否臣不敢與知獨謂由陝西抵宣大地方數千里又必交代有人始克離任以故命下迄今將兩月餘暫者未得卽真而廷推者仍在關右此居常時則可設使邊務方殷口尚充斥緩急能有濟乎臣查得宣大等處原設總督軍餉侍郎一員此可爲總制之貳在今日當復焉者也或謂各邊糧餉以督理則有郎中以名買又有主事豈其調度不克料理缺人云爾哉臣則以今日之復總督者不特爲軍餉也爲總制也蓋總制任重者也而邊方事體又與腹裏不同非早見而豫待之鮮有得其要領者故臣願陛下之復之也亦不獨責以軍餉而已凡各處兵馬之強弱將領之勇怯與夫關隘城堡之險固一一親歷而預圖之寄以總督之名俾預養夫總制之實夫如是卽使總制得人平居可以籌畫有事亦可以協謀且於總制有共濟之美而又免夫供給調度之煩萬一缺人卽以總制之責責之此與非嘗試而取諸遠者當有不

同焉者矣又如兵部尚書戴金近以言官論劾而去今所推者爲原任刑部尚書唐龍也龍雖總制三邊人望攸屬但原以終養而去卽今其母尚存陳情具奏事體必然往返數千里辭而弗獲然後就道不亦遠乎已經該科具題奉有明旨無容議矣但以事體言戴金見任者也旣以論劾而去唐龍起用者也又以終養未卽遽來是近者不勝任而遠者又難於任矣當國家無事時不能預養賢才以儲用及至事迫始克圖之舉動若此非長策也臣又查得十二團營原有提督尚書一員此可爲本兵之貳在今日當復焉者也或謂各營軍務統之以本兵攝之以勳戚亦豈約束或寡操練缺人云爾哉臣則以爲今日之復提督者亦不特爲團營也爲本兵也蓋本兵責重者也其任固難况當多事之時又難之尤者此豈不更歷而苟焉以趨事者所能辦乎故臣願陛下之復之也亦不獨責以營務而已凡各處兵馬之強弱將領之勇怯與夫關隘城堡之險要一一周

訪而預處之寄以團營之名俾預養夫本兵之實夫如是即使本兵得人平居可以口蓄銳有變亦可以折衝且於本兵有協恭之益而又省夫督率統理之勞萬一缺人即以本兵之任任之此又與非嘗試而取諸遠者當有不同焉者矣又况總督既立匪惟糧餉攸賴而總制有人其入也亦可以統政而本兵無缺矣提督既立匪為營務攸賴而本兵有人其出也亦可以備邊而總制無缺矣一官而兩利具焉何為不可若謂勢分則不專官貳則無統此非通論也何也總督軍餉戶部事也提督團營兵部事也就以二部言而事體可知矣戶部十三司各設郎中一員惟山東山西陝西三司復有督理糧儲者五員兵部四司亦各設郎中一員惟武選職方車駕三司復有協管司事者三員以其體衆而關係大也郎中一司事耳且不能攝協同而治事體固然况總制乎又况本兵乎然則總督之於總制也提督之於本兵也適以相濟而非以相厲也臣願勅下該部從長議

處庶幾先事有備敵之人臨事無乏才之嘆不然戎務大事也安攘大計也惟歸重於一官取疑脫必於一人事至而又曾議人缺而後會推不亦晚乎此臣所謂總督提督之當設者也臣待罪言官一得之見妄意如此謹冒昧上陳伏惟臣聖明垂察臣愚幸甚謹題請旨

嘉靖二十四年閏正月 日

巡撫貴州都察院右副都御史禦苗奏疏 鮑道明 三峯

巡撫貴州等處地方兼理軍務都察院右副都御史鮑道明為請乞  
亟張軍威以禦苗患以安生靈事據湖廣按察使司整飭辰沅兵備  
副使李心學貴州按察司整飭思石等處兵備分巡帶管思仁撫苗  
道僉事何全呈問得犯人張問招年四十歲係四川布政司播州宣  
慰司管下容山長官司正長官應襲土舍狀招本司治聯貴州鎮遠  
府施秉縣界問與本司未獲副長官應襲土舍韓甸各因本管隔遠

侍貴州異屬各不合糾拽生苗合夥聚眾攻燒村屯劫財殺人姦占軍民婦女田地擄掠牛馬等畜積惡多年流毒萬姓本司正長官印信韓甸又不合奪掌以致燒燬司轄二里人民房屋節年讐殺兵連禍結貽害地方臣看貴州夷苗歷年桀驁蓋緣山險菁深進征爲難前此鷓剿之功或三四十顆至百級止矣未有如今次擒斬之多其間又有陣亡官軍葉勳等未收全功比時總兵親董戎行各官先後附疏先事失於隄防臨時疎於應援罪固莫逃及查用兵未及旬餘攻賊已破數寨先後功次又幾二百名顆俘獲稱是非上下協力莫克至此功又不容泯焉爲照鎮守貴州兼提督平清麻陽等處地方總兵官前軍都督同知石邦憲清約律已恩信撫軍諸苗憚其威名三省賴其保障偶以防守之行卒爲應敵之舉惡苗乘遇葉勳傷亡但拘洞岑賈二寨旣獲多功而張問韓甸一兇又經俘獲似應以功贖過久任地方以責後效者也協同鎮守貴州兼提督清浪等處地

方右將署都指揮僉事郭元承調旣速軍威賴以振揚督陣有方羣

情銳於向往守備貴州銅仁等處地方以都指揮體統行事署指揮僉事安大朝冒險而麾兵前進擣寨而斬賊奏功一則先以紀驗功次解赴軍門一則又因昔郎冷水等苗乘虛集劫掣回平頭等處此則功成二寨不與總場有功無過均當優賞者也內安大朝智能料敵勇足衝鋒功級獨多勞績懋著尤宜首論指揮陶啓中李祐高良材朱冕李鳴鳳孫銳張渙丁時千百戶王夢麒易偉郭正并土同知何承訓或奮勇以先身或臨陣而衝敵此則始終同事罪小功多亦應量賞者也及照守備葉勳百戶魏國相雖云職有崇卑均之身死於勤事所當照例恩恤以勵後人其陣亡土舍劉昱軍人楊牯牛等重傷施秀清等并有功吳老五李司引等已咨軍門酌量賞恤外其張問苗普哥等係重刑旣該思石等道兵備等官何全等審閱明白具呈巡按御史覈審候奏請至日會同三司等官押赴市曹處決

梟示緣刑賞重典乞 勅該部一併查議請自 上裁緣係請乞亟張軍威以禦苗患以安生靈事理臣未敢擅便謹具奏聞

南京戶部尚書乞恩休致疏

鮑道明三峯

南京戶部尚書臣鮑道明謹 奏為病久莫支懇乞 天恩放歸調

治以延殘喘事臣年六十二歲直隸徽州府歙縣人由嘉靖十七年

進士初授行人司行人陞戶科給事中三轉兵刑五陞藩臬繼以南

京應天府尹陞都察院右副都御史巡撫貴州等處地方復改南京

大理寺卿陞戶部左侍郎嘉靖四十一年十月十四日荷蒙 聖恩

授臣今職念臣質本駘下材復迂疎累蒙 皇上天高地厚之恩涓

埃未效詎意分量已過禍至災生於本年初八日左手萎疲不

能舉動越二日左足亦然口眼歪斜舌木弗能言語漸成癱瘓之疾

夫臣稟受素非薄脆止緣不善調防浸積致然也當即訪醫調治延

及月餘前疾少定即今手雖可動握髮振衣猶假於人言語強發氣

壅而促聲不相續足覺行步欹斜莫克久立拜跪弗能也復不自量

念衙門見在堂上止臣一人凡百廢擱勉強三五日一出少理部事

屢為寒邪所侵事少關心怔忡無已一勞失逸終夜不寢於今三月

矣前疾未祛精神日損必須靜處山林安守歲月齋居洗念庶幾可

望瘳矣衙門非養病之所尚書豈竊祿之官伏望 陛下憫臣病餘

殘喘乞 勅吏部放歸尋醫專治萬一生全有地前疾漸瘳得為盛

世完人竊覩太平之盛臣之大幸即不幸醫藥罔效終成廢棄則未

死之年皆感 恩之日也臣不勝激切懇籲之至 聖旨吏部知道

欽此欽遵抄出送司案呈到部看得南京戶部尚書鮑道明 奏稱

病久莫支不能供職乞要放歸調治一節為照本官負性渾厚蒞官

勤恪敷歷中外士論共與計曹重任正當倚用今據奏稱手足痿痺

不能舉動情詞懇切似非得已合無 俯從所請准其致仕原缺另

行推補但係南京二品堂上官員去留出自 朝廷非臣等所敢定

欽此

擬伏乞 聖裁緣係病久莫支懇乞 天恩放歸調治以延殘喘及奉 欽依吏部知道事理未敢擅便等因嘉靖四十三年二月十六日該吏部尚書兼翰林院學士嚴訥 等具題本月十九日 聖旨鮑道明准致仕欽此

南京兵部右侍郎感謝天恩乞憐衰病容令致仕疏

鮑象賢

南京兵部右侍郎

臣鮑象賢謹奏為感謝

天恩乞憐衰病容令致

仕以全

臣節事

臣由進士選授監察御史歷陞僉事副使叅政按察

使左右布政使者二十餘年荷蒙

聖恩陞授都察院右副都御史

巡撫陝西等處地方

臣

惟力小任重恐無以稱職業勉強支持事方

就緒適有元江逆鑑之亂蒙允廷推命

臣

以原職巡撫雲南等處地

方兼贊理軍務

臣

星夜赴任至則人心危疑內外懷貳

臣

宣布

德

威示以形勢而逆鑑自伏其辜餘黨俯首聽命地方以寧任將二年

蒙陞刑部右侍郎行至中途復蒙

聖恩改

臣

兵部右侍郎提督兩

廣軍務兩廣缺提督者八月有餘山海之盜乘機嘯聚道路不通

調發分布相機剿撫仰仗

天威幸有成績地方頗安二月十六日

准吏部咨該本部題奉

欽依改

臣

南京兵部右侍郎

臣

遵例候代

間二十二日得邸報該陝西道監察御史孫哀劾

臣

不職不堪重任

伏蒙

皇上不卽加誅行部覆議令

臣

回籍聽候再議別用

浩蕩

之恩

曲成之德圖報無由除望

闕叩頭外

臣

切思之

臣

以菲薄

之才謬膺三鎮之重任人行政豈盡合宜蓋兢兢焉欲寡其過而未

能也孫哀不能查舉以匡

臣

之失乃剽竊影響點成文而又揣摩

俗弊之所有搜檢奏牘之陳言不問何人之事移以歸

臣

之身及將

已奏之章指為欺罔之罪中間編排詆毀任意恣言特以泄其憤憤

之氣雲貴之人所知也夫大臣被論禮當引咎責躬

臣

雖微眇荷蒙

簡拔之恩得從卿佐之末若瑣瑣與哀辨論是否攻訐隱微以瀆

聖聽以傷大體

臣

不敢也但

臣

年已六十氣血日衰百病交作恐誤

地方大計久欲陳情乞休適兩廣山海之多事南都調發之紛紜不  
遑啓處敢自求安力疾支吾益加困敝今幸蒙 恩准回原籍聽候  
別用乃敢披瀝微衷仰祈 大造如蒙疑有乞脫字 勅該部查臣之素  
履憫臣之衰病容臣以原職致仕使進退有據臣節以全則自今以  
往未盡之年皆 鴻恩之所賜也臣敢不朝夕焚香敬祝 齊天之  
壽耕蠶盡力勉圖惟正之供臣無任戰慄祈懇之至

棠樾鮑氏三族宗譜卷之一百九十

序

西溪詩集序

方

回

萬里虛谷

吾鄉大儒先生近世天下第一品人紹濂纂洛傳孔孟之不傳其大  
者未易歧及其平生爲文及四書釋用不緊要字處乃是十分至緊  
要字胡邦衡早以詩薦於孝廟似舍大而言細然其爲詩實高妙用  
陳無己之律而與所友趙昌父之作相肖所謂善用虛字爲實字如  
趙茂實所序者是也鮑君壽孫子壽與予同生朱文公之鄉少予二  
十三歲歲己亥年五十其冬以類藁詩五種雜文數十篇走武林見  
教今書其顛以謝嗟夫詩非工之爲難而莫難於不工文非不以痛  
快爲貴而貴於以婉曲藏之君詩如掃松懷橘躬畊意釣鞭尸抉眼  
塵尾臯比赤烏丹鳳將雛舐犢淺斟高卧我無孤鴈句君有倚樓詩  
一樽浮太白千里策飛黃千篇異代垂金薤一曲當年忤玉環皆有

料而工矣如但喜親庭健何愁客路長則上四字乃不工之工也如少日從遊今老矣殘冬話別各淒然下六字乃不工之工也此先儒所謂虛字也如送柳州教云重生子厚爲師範更與宣尼續廟碑亦是上四字有力所謂不緊要處乃十分緊要者也文亦然疾呼猛喝非不痛快然未若閑慢悠遠以婉曲爲痛快也君之文爲使君待其公記社稷壇不減鄂州羅公願送柳巖崑山三教授序及三講義攷究甚精議論尤粹皆甲午乙未丙申分教鄉校所作之文君年十八丁卯領江東漕舉文聲久矣既進而爲金石之文與塲屋異大抵君學有淵源知夫用虛字與不緊要字之微機幹移變化五七千百固亦婉曲痛快枯且淡而瘦以勁矣由是以學子朱子之大者而至之豈特詩與文哉鄉先達丞相程公元鳳奏補君門客登仕郎前浙東提刑汪公應元丞相表弟君祖母汪夫人乃其姊教君業童子科君母吳夫人乃禱齋鄉先生吳公自中之女孫知書早誨以詩禮之傳

其文獻所自如此而加以世德積善賢父子丙子遇鄉寇願相代死垂危而免自當家傳別書

薊林集後序

吳德昭

至治癸亥予備員徽泮士友多道郡先達雲松鮑先生之賢惜來之晚不獲登其堂識所謂老成典型者詢其次又聞有景文先生嘗掌教歛庠以待母疾辭歸竟不仕則雲松之長似而後於伯氏者也未幾郡有文會景文與焉聆清談而瞻矩範有不能不起敬者一日景文出示所作薊林彙予讀之喜其清奇簡古要自胸中流出不蹈襲前人有可尚者且憲使鄧公善之嘗爲印證判簿許公應旂又爲之序予何言焉獨念以君之才取功名如拾芥乃不着祖生之鞭而唯效曾參之孝是又可嘉已乃書其末簡而歸之

出處小彙敘

鄭久成

士恆

詩之有關於世尚矣自康衢而下歷代相承以迄於今其詩蓋皆可

攷也氣運之升降治道之隆汚人心之嫩惡咸於是乎見焉其有關於世也如此靜軒鮑公早生承平之世仕寬大之朝故其發於言者率皆和平之音逮夫重熙累洽地大孽生君臣逸於上民物瘁於下干戈相尋四海鼎沸於是和平之音變爲憂憤之辭矣蓋其愍時傷俗之意雖欲不形於言而自有不容已者如是而無傳於世可乎雖然窮則變變則通天下亂極矣此人心思治之秋也其轉移之機不有在於上之人乎饑者易爲食渴者易爲飲於斯世也怨刺爲頌美有不難者夫如是則斯集也始終無怨怒之音將與康節邵子擊壤爲俱傳矣

此序當載第四

### 心田道院設醮詩序

鄭玉 師山

國朝之制士大夫官至七品皆得推恩其親爵秩視其子至正七年五月新安鮑同仁以年勞升七品受從仕郎邵武路泰寧縣尹以歸明年之官泰寧以狀請於朝如故事九年十一月 命下同仁父景

文先生周封從仕郎徽州路黟縣尹母妻皆宜人 命下之日先生適年八十自思 朝廷寵以爵秩造物賦之壽考無以報效先是先生預卜葬所於城南之葉有築宮其旁居道流以守之正一教主天師大真人爲題曰心田道院十一年二月卽其中設醮三日旣以答天貺又以報 國恩闡事之際雲鏃鉦鼓聲震林谷步虛散花韻遶雲漢先生盛服入就厥位俯伏在地誠敬恐悚真若上帝之臨乎前也九朝旣畢四鼓方鳴天地開豁星辰明概乃行三祭酒之禮醮事告周壇遺斯徹神人喜歡形於歌詠道士黃師立首賦唐律一首以道其事子姓宗族朋友交游更唱迭和積成巨帙鄉里傳誦以爲美談師立一日攜以見過求余序其首此詩人天保之意而虎拜稽首之事蓋余之喜聞而樂道者况玉於先生爲通家子弟執筆書之其又何辭

當載第三

### 送鮑翰林赴官陝右序

趙沔 東山

韋布之士起家而仕於王都則固已遠其親矣雖其人志存終養初不以得於外者爲父母榮然一旦郡太守奉天子之命以臨之而親勸爲之駕則父不得以有其子子不得以私其親論諸古人亦曰以義斷恩而已况乎既居官而食祿則易于之分已定設有中外出入之異遠近勞逸之殊君子豈復容心於其間哉翰林脩撰鮑君尚綱初以郡太守王君薦辭其親來京師爲中書典籤由典籤入翰林爲編脩遂陞脩撰至是自翰林出貳陝之屬郡關中交游之士咸以關中距京師又數千里若懼尚綱無以慰其親庭之望者抑何見之晚耶吾觀尚綱少學於家雖服勞養志曾無寧日其辯乎出處之際而審乎分義之安不爲不明居翰林者數年接於公卿大夫之論議而酌乎當務之緩急不爲不久所謂中外勞逸之殊蓋無足以動其心雖其家君所屬望於子亦有必在此而不在彼者尚綱何患無辭以白其大人哉近代名公偉人有仕於州縣而因得留心政理以成

其志業者有以在內爲無補而請郡以自效者皆士君子所當取法凡仕於遠郡者不難乎得民而難於獲上今大叅汪公輟中臺之重建行省以撫關中以都司出使軍中且贊襄省事者鄭君士恆其人也尚綱嘗辱知於大叅公而與鄭君遊甚善宣上恩德以加惠黎庶寧有不自遂者哉

當載第八

鄉飲酒序

鮑深 伯源

鄉飲酒者敬老尊賢敦行古禮以敬讓爲先而飲食次之故郡庠敘德敘齒而後敘爵所以勵風俗也鄉里則敘齒而已今朝廷務行古禮欲勸民爲善故有鄉飲之制使民日趨於善觀感而化之意太守下車之初急行此禮酒闌囑老人而言曰太守之所以與爾分庭抗禮者遵朝廷之制敬爾耆老爾歸語爾兄弟子姪鄉黨鄰里之人俾之知所謹戒進德脩業遷善改過知朝廷之德意也嗚呼吾宗居於此者十三世矣自曾叔祖雲松先生教授鄉郡以儒鳴於時

自後詩書之聲不墜家世忠厚父子爭相讓死事載宋史儒先長者咸稱曰慈孝鮑家兩經兵燹而門閭猶存豈非慈孝之所感而然歟不幸壬辰之變今二十五年差科既繁生理不給遂致廢學性命道德之說邈然無知而孝弟遜讓之禮或存或亡易曰善不積不足以成名惡不積不足以滅身子懼夫其日流而忘返也間嘗謀於衆曰太守奉行鄉飲之禮如此我輩亦率兄弟子姪四時朔望會於家庭成人者咸序齒而坐幼者環立而侍讀律使之知公法不可犯說書使之知爲學之方舉酒使知長少之序互相糾正酒止七行董茹止三品各隨其宜不許誼譁戲謔不許議論官府是非違者尊長行罰重則申舉庶幾開發其良心導之爲善俾幼者亦觀感而化少裨太守之政教也預斯盟者幸毋忽諸

當載第六

雙柏詩集序

鮑寧

庭謚謚齋

雙柏集者吾宗先達政十一公所著詩也公諱浚字伯尚爲寧高祖

同知府君仲子曾祖山長公之母弟自少出爲叔父得臣公後年二十餘以孝弟有文見譽於鄉之長者作古今詩與山長公相上下於時山長公正盛年工文章善幹蠱交好賢傑聲譽籍甚公則孜孜務學方責成於已不求人知然凡交於山長公者莫不賢公之爲人又五七年婺源鉅儒張子經先生來鄉里橫經設講席師山鄭翰林攜酒過耕讀堂訪尋故舊爲斯文宴吾宗與會者凡六人各分韻賦詩師山得公詩讀之謂其流出肺腑不失性情之正有三百篇遺味由是聲譽日著未幾值元季兵變鄉邑強凌弱衆暴寡擾攘者五六年亦有招合外寇殺人無忌者山長公思以拯其弊也爲開陳禍福道之以信義爲保全計公及里之賢者實贊之而鄉人賴以安由是公晚年德望益重於時詩雖平生餘事亦至晚而益精其雍裕清婉自得之妙蓋有人不及者原藁多散逸所傳者僅百五十餘篇正統甲子公之曾孫昭等因闕家乘謂六世祖而下代有集藁皆得名公序

以發其端而雙柏集獨闕屬予追述以傳後寧雖未及識公而於公之善行則熟之於心久矣又何敢辭聞諸長者謂昔得臣公早卒無子孺人江氏以守節不貳自誓泣請同知府君撫公主喪事公時纔五歲淳慤異凡子孺人愛之不異所生公既長致孝於孺人如實生已孺人五十餘鄉里以其事蹟上之朝得旌表其門至享春秋八十餘而公之所以敬養者不少替古所謂大孝終身慕父母於茲見矣其他行誼之善有不待備贊者而况於詩乎然則讀公之詩當知有德者必有言而不可專以詩人工於辭論也公所居宅畔有雙柏暇則吟哦其下鄉人因稱雙柏先生云

當載第七

### 標幽賦註解序

鮑同仁

國良靜軒

鍼砭之法自黃帝岐伯肇始周濟斯民三代而降數千百載間明智之士傳其術造其妙者幾何人焉至唐秦鳴鶴著述銅人鍼灸經宋徐父伯繼而註之皇元太師竇漢卿兼以茲術鳴世浙東王敬潭得

其傳而造其妙矣其後亦無聞焉近世之醫分爲內外二科內科名曰方脈方用藥外科所用燔針鉞針排膿刺血是以治方脈者不理針法用燔鉞者不知方脈各宗其業各傳其術至於先聖前賢所傳針砭之妙漠乎無聞焉惜哉予幼嗜醫長好尤篤及宦游四方嘗求醫師之良者而一論之猶未獲也至元己卯秋江西來歸聞金華王人翁得針砭之術所治奇中以禮致之遂舉家傳敬潭目科以示得聞其所未聞是年冬復遇遂陽方牧之相與極論其說亦出敬潭之傳而尤善攻雜症予謂敬潭竇公弟子也得其業而精其術矣觀其所註猶有疑焉暇日乃取銅人明堂鍼灸經圖揭之坐隅覩十二經絡之所聯屬以自己手足捫經循絡探求諸穴而默識之凡遇病者必究其因而辯其証察其脈以求其原依法治之百發百中數十年間癱風拳攣鶴膝跛蹙疼痛腫目昏赤眩治而愈者不可勝計今也顧予年之耄而懼夫日益荒落考之素問靈樞經參以諸家之說

註釋此賦以十二經絡各畫一圖分經所屬為之旁註并識經驗之穴總成一書俾初學之士必於此而求之庶乎有得矣當載第五

送尚敬省尚綱行序

朱升楓林

歲十有二月乙亥立春鮑尚敬告行於予將省其族兄尚綱於官所馬蹏路軟梅片泥香籤府晝長棠花春映首慶重闈之康健歷敘半載之睽離公私忻悅何事不有而委曲傾倒於茶甌燭影間不亦一時喜愜之情哉尚敬責予贈言予亦何言之有然居常以為士之立身以履運也世味不可不淺自待不可不重其學必優為宰相而其守必甘為窮櫛之隸夫世味不淺戚戚乎中自待不重沾沾乎外不優於相則用有不行不甘於隸則有舍而不能藏者矣斯言也天下學士之穀粟草石也然唯質美者得闢之唯宦學之家世有令德者聞而喻之亦唯久相與游知斯言之果可服行者然後能享而樂之也二鮑兼是三者予故贈之斯言

贈蜀川鮑執中昆季序

鮑寧謚齋

予鮑氏始居棠樾歷二世而有遷於蜀川者相去僅十里為棠樾後者衣冠文獻足以紹前人之休居蜀川者忠厚禮讓足以衍故家之澤其德業相照耀為世所羨今蜀川故處士字仕昌之子若女若配又皆有可稱者焉處士當盛年卒配許氏有賢德砥礪大節成處士之志而經紀其家育二子一女悉訓以義方二子長曰執中季曰邦傑俱早樹有為而見推於鄉黨女曰德全年二十歸王氏方一月而夫亡毅然以節自持上事於姑而能盡終養之禮下撫夫兄之幼子伯幾以承夫祀執中昆季推同氣之義而扶植之以成其志使伯幾立受以成業節婦年五十四里邑舉其事上諸朝得旌其門華表巍然日星光潔照耀閭里可謂盛矣初里之有是舉也節婦以無力辭伯幾有志而不敢主焉二昆季則曰此吾兄弟之責也復捐已貲以周之乃謀於所親兵部郎中吳公而與力焉由是公論所在上下

交贊卒底於成遠近聞者咸歎曰二子誠篤於義者哉夫女子有行遠父母兄弟矣節婦歸王氏三十餘年父母無存矣而昆季念之不少怠濟其事尤力是不獨成其節婦之名而又有以蓋覆王氏之後亂也故君子嘉其義而重其爲人於是其姻戚程宗寧與予有通家好詣予以衆辭告且請曰吾子以文章鳴世今士夫之門有行義可稱道者必於子以求紀焉茲執中邦傑之賢如此第其宗與吾子同出一源願一言以識其善予曰噫上古皇風清夷民德歸厚比屋可旌雖不書可也然而三代以降世教日弛民俗趨下能盡人道之常者誠不多見矧茲執中之門尚義立節卓卓若是須書以爲勸使聞之者因之以自勵豈不有關於風教者哉宗寧進曰子言至矣請書以爲二昆季贈

去思詩序

去思詩者前太守朱嘉孫公旣去徽士民思之而作也昔公爲秋官

鮑寧 謚齋

主事以多病乞歸大臣高其名不聽其請謂徽江左大藩薦公俾卧治焉公爲政以清心省事爲本始至郡一切事有擾於民者悉罷去不煩其令使民易從其聽訟也情可矜者辨遣之怙惡不悛者繩之蒞政幾四年病居其半推心以待物鎮之以靜而民益安嗚呼此所以無赫赫之名而有去後之思也歟士民所以思於公者或見於篇章或見於方言不一而足休寧士曰孫鼎嘗親炙於公最深於是因士民之歌采其近而可知者裝潢成卷將詣公廬以申起居之間屬寧敘之寧謂公心學高明清風雅德足以表正流俗故在位而民安之旣去而民思之思之不足而詠歌之詠歌之不足至有不遠千數百里而造其廬者焉嗚呼非德義之感於人心能如是夫昔寧之見公也公待以客禮而忘其勢分之高下寧退而言曰孟子所謂古之王公好善而忘勢我公有焉雖然樂其道而忘人之勢寧也亦不敢不勉由是寧雖感公知遇而足迹未嘗輕至公門是豈疎於公哉蓋

道義之所存也此鼎所以不遠千數百里造公之廬而寧所以拳拳於述其情者歟鼎往拜公於庭下請以六邑士民之思公者爲公壽復爲我謝曰寧昔受公明訓謹不敢忘公賜梅花與詩尚無恙他日鼎歸寧候之於城東門外以審公之安否倘得見公手翰又如親見公焉是爲敘

天原發微辨正序

鮑寧 謚齋

宋之南渡也新安郡有文公朱子生焉距朱子之卒不數十年寧之同姓先達魯齋先生與同邑虛谷方公相望而起以倡明朱氏之學虛谷嘗達而見用文章播海內遠近仰之魯齋隱居林谷窮天人理探造化之源於聖賢經傳無不讀而尤盡心於易凡歷代史志暨名儒異聞之士所論天文地理陰陽律呂性命鬼神之奧者無不窮索而所宗主則宋之周程張邵朱六君子也嘗細繹朱子所釋周子太極圖說以闡明孔子易有太極之旨復因邵子皇極經世之傳以深

究宓義先天之妙晚年著天原發微五卷以大易爲根柢周邵太極先天二圖爲統要掇取往聖先賢之格言而爲之辭大者爲綱小者爲目總成二十五篇以况天數二十有五其首篇曰太極者統天地萬物之理而名之也義文周公未言孔子晚贊易始言之繼之者周子無極而太極邵子道爲太極是也次日曰動靜者周子謂太極動而生陽靜而生陰一動一靜互爲其根是也次日曰靜動者言靜爲動之根先天圖坤復之間爲無極邵子謂天地人之至妙至妙者也次日曰辨方者先天圖陰終於子半陽始於子半明造化終始於北方也曰立渾者乾健坤順大無不包而萬物由之以出也已上五篇約而論之動靜生陰陽陰陽生天地天地生萬物而太極實爲之主此萬化之源也其第六曰分二而繼之以衍五又繼之以觀象何也曰繼之以衍五者太極圖謂分陰分陽兩儀立焉陽變陰合而生水火木金土是也繼之以觀象而列太陽太陰少陽少陰者經世謂二分爲

四卽大傳兩儀生四象是也其見於著爲七八九六形於地爲水火土石著於天爲日月星辰變而通之其義無窮也曰少陽少陰二篇備言星辰之象矣復列天樞一篇何也曰天樞中宮天樞星太乙之常居也星辰中而有天極猶人類中之有大君故特表而出之也夫有理則有氣有氣則有數前之所論者氣有萬殊而本於太極之一後之所論者數有萬變而起於中宮之一此天樞所以居二十五篇之中也其十四曰歲會者言日月之行一歲有十二會卽一歲以推一元十二會包括往古來今無不在是此經世書所以衍其妙也曰司氣者以四時分十二月又分二十四氣七十二候使民法天時察物變也曰卦氣者以四卦配四時六十卦配一暮之日卽焦京所傳治曆明時之道也曰盈縮者謂一年之日有氣盈朔虛之不齊故置閏以成歲也已上三篇明聖人用數之妙所以裁成天地之道而不忒者也其十八曰象數者謂河圖洛書易範所自出象數之所起也

其十九曰先後者伏羲易爲先天文王易爲後天孔子贊易兼先後天也曰左右者以左旋右旋言天道日月一也河圖洛書二也先天圖三也總二篇論之先天以開物後天以成物左旋以生物右旋以成物也其廿一曰二中者天數五爲中地數六爲中君子法天則地時中也其廿二曰陽復者自午月一陰生至亥月則純陰矣至子月卦歷七變而一陽復生故曰七日來復天行也陽爲善陰爲惡君子法陽之復復於善也其廿三曰數原者言數之變無窮而其原則一觀諸伏羲之卦畫大禹之九疇孔子之大衍皆妙極道數者也秦漢以下言數者流於術而已獨邵子闡先天之學爲得之朱子集大成又貫理數而一之者也苟有志於數學者求之三聖二賢斯有以得其原也其廿四曰鬼神者張子以二氣之良能言之謝氏以天地間妙用稱之誠有未易言者其所以殿諸篇之後欲學者明天人之常道而後求諸此也未篇曰變化者在天地有陰陽之變化在人有學

問之變化知變化之道則匹夫可爲舜塗人可爲禹而學問之功於是爲大也嗟夫天人之理一而已矣天地一太極吾身亦一太極也天之陰陽五行卽吾之健順五常也太極流行於萬化中卽吾心之酬酢萬變而不失其道者也第人之生有氣稟之不齊則太極有不能皆全者矣學者之由教而入也其必於萬事萬物中求其理之所在而反之身焉則有以變化其氣質開發其聰明而太極復全於我矣先生所以輯二十五篇之書而致重於首末者其微意豈不在於是乎抑又聞先生在當時其纂輯是書也虛谷往復數十札相與剖析辨難多矣其推敬之辭有曰執事不特年高於某識見亦高不特吾鄉無之恐當世未必有斯人也由是先生身雖隱而道益尊及書成年七十餘矣既沒世而益大行得之者如獲珙璧板燬於兵火猶競錄以傳逮今幾二百年而益盛寧嘗得原刻本讀之味其辭可喜可愕觀其論數從橫變化無所不合意其得於邵子爲深論理本程

朱子發明至到者固多但精擇之未至而未免有失予固重其爲寶而猶恨其有瑕嘗欲考據先儒之說而辨正之然未暇也吾友程孟張惟達咸曰誠如是斯有以全魯齋之美矣幸蚤成之於是始事於天順庚辰三月塾賓朱儀贊之任勞閱錄越明年二月書成晦者明訛者正同志喜曰是書必傳無疑使九原可作魯齋必有以愜其心也於是孟與儀復輯圖卷首以資考索且謂天人性命之理誠有難言者宜序之以告當世大人先生印證其可否而賜教之則斯文之幸也是月望日新安歙邑鮑寧敘

贈程文實序

鮑寧 謚齋

予家去槐川不二里視程氏爲世戚而予又與文實俱業儒爲同道交地近也世戚也同道也其相知之深爲何如嗟夫文實世家後裔之賢者也脩在己之學以紹德於前述先世之勳以垂聲於後此其志也數年前文實以其六世祖丞相文清公所上宋理宗道學表并

救災備邊諸劄俾讀之予歎曰不圖公之造道至於斯也其濟時垂訓之典乎文實曰先丞相文翰甚多今存者無幾家傳者若干篇續得者若干篇小子將益圖之彙集以垂永久誠大願也未幾又告予曰先丞相去忠壯公凡若干世忠壯勳烈之大者梁史固載之矣然神而明之以廟食百世膺誥命之褒贈而垂耀無窮則至宋而後大備惜其文辭事實散漫間出而無以覩其全嚮者嘗得一二而珍襲之今也天與之幸十得七八矣僭欲有所論述窮上極下旁通曲暢以備一家之言庶有以垂不朽予謂如何予聞而壯之又二年文實遂以成書二帙屬予校其得失其一曰明良慶會錄則先丞相在位時君臣賡歌賜奏之辭暨其出處本末也其一曰程氏源流錄則述忠壯公爲詳上沂其源則忠誠君元譚公之遺事可以槩見下衍其流則雲仍之賢者達者可附載焉一開卷間上下千數百載如指諸掌而程氏之文章人物如繁星麗天其光芒有不可得而掩者矣嗚

呼使文實以文學發身得一郡一邑以自効所以顯揚其先者又豈加於此哉惟其不爲一代之顯故能永百代之傳此君子所以有取於斯也今年八月望日文實年周五十是爲始生之辰諸君子因其述祖之有成而願其流慶於永久此歌詠之所以作也雖然五十而知天命聖人事也行年五十而知四十九年之非賢者之希乎聖也文實於述祖可謂有功矣由是而進脩不懈則聖賢性命之學必將與有聞焉文實其勉諸予日望之

天心復要序

鮑泰希止

聖人立極制器裁測天地氣節日候定分時序以爲民利而曆運甲子者甲子與易同體彌綸天地陰陽萬化五行之道行載古今天下時日月歲之用之所當要者也一日十二時辰五日甲子六十時滿爲一候一歲十二月二十四節氣一節氣當十五日兩時辰五刻一時辰八刻分上初下正則子之上四刻爲今夜子時下四刻爲明日

子時所謂冬至子之半天心無改移者是此明日子時而天地萬化流行皆自此始也易曰復其見天地之心乎冬至在子復陽始生爲十一月中氣夏至姤陰始交爲五月中氣而芒種爲五月朔氣節氣日候分乘六十四卦運令變通形行四勢有旺有休而用乎天之道者乘其旺相之時也時刻正初卽日之子午月之中朔年之冬至夏至皆一致也亦太極變分兩儀萬化而各一其體者也天紀周環三百六十五日三時辰經運天紀度數一周以爲一歲月行一日又不及天一十三度十九分度之七於行二十九日六時辰三刻會日分朔爲一月一月兩節候於積八十七刻有奇以爲閏額十九年月得七閏與節候合齊是爲一章候亦以閏補其節月朔日辰時刻滿八十章而復同節候日刻則八十年滿而同也十二時辰以生旺墓三者分類乘節四年一周應乘月交朔則四章一周刻准節氣三合相乘於交

節刻次年年是同而月朔所交之刻則章章同也流行一萬三千六百八十年應合大小限度運序周齊爲一會然嘗驗歲曆載諸月節交遞之次不亦更迭紛紜按元紀綱目書自漢後曆之經改者七次創法者十三家時嘉郭守敬施設測驗參考脩正言冬至者曆之本求曆之本者在驗氣惜乎其知言冬至爲本而莫知求其本元冬至甲子刻次以爲推步標的而驗氣云乎又莫知求天之度數以爲統領而言酌取中數是皆大經典則猶有未舉而誰乎得語其致可永施無弊載於史愚於世也孟子謂千歲之日至可坐致而其運有常邵子申明孔子彖復見天地心而無改移原此追致甲子運來日時月候歲節之建有一定耦乘應合序則之可驗而無毫髮移也此天地律運自然之文也大有大則小有小序曰驗氣者將之證其候可也苟不知復根源大本之致而言驗氣爲本者是未知學孟子邵子之學也泰也非學也者因原其本作節候鏡藏於書笥十年有識

者曰子年益耄於顧紛紜更迭者日復日如况漢太初之作而又十  
三家之創七十次之改守敬之測影驗氣皆於其本有未得而更紛  
無從證也子以孔孟之言申致其本末之備者豈非天假子鳴其道  
其可復藏乎宜書出曉於人通於時又其不切有關於用也爲復敘  
月朔章運脩輯節候圖欸分致序乘限則循環周照往古來今會序  
歲月節候日刻總總齊具維我大明開萬萬歲之運申時序之齊  
而被於天下後世無窮也弘治甲寅冬十月新安鮑泰希止書敘於  
天都山之獨月樓

孝徵錄序

唐 臯 守之  
新菴

孝有徵乎曰無徵弗信幾於僞作之者僞作之者所以風乎人者功  
亦微矣孰徵曰徵於人猶有喜名之弊惟夫徵於神也神不可得而  
欺也神不可得而欺人滋信之善心萌焉有不俟勸而趨於孝者誠  
之致也曰薛徵諸人宋徵諸鬼仲幾之所以受戮也神可恃以爲徵

乎曰靡誠不通有感斯應神之妙用也孝脩於外誠發於中神之應  
之徵之於事理蓋有或然者人不可得而測也此造化之幾而有至  
妙者存焉鬼神者造化之迹也而况於孝之克誠固足以動天地感  
鬼神者乎中嶽太和山有佑聖真君之祠其靈妙聞天下予歛鮑氏  
子釗因其父疾致禱於神甚虔與黔婁之稽顙北辰同一孝感之誠  
已而父疾頓愈釗卽裹糧數千里躬詣太和山昭答神貺甫至山之  
半風雨雷電陡然大作頃之乃霽仰視雲氣中彷彿見神像隨行者  
莫不駭異聞諸人人咸以爲非釗之孝脩於己誠通於神烏能徵之  
若是耶與釗好者爲求能言之士聲諸詩歌積若干首錄成巨帙因  
名之曰孝徵錄介予宗弟鄉進士節之求予序因不辭而序以歸之  
竊疑人或有議之者曰茲事徵於神而鄰於怪皆子所不語者奚以  
序爲則將應之曰子不云乎孝弟之至通於神明夫通則徵徵則信  
信則傳傳則勸奚爲而不語所不語者蓋有之矣我未之見也

嘉靖癸未三月朔

賜進士及第翰林院脩撰儒林郎兼經筵國史官新菴唐臯序

思菴鮑使君自江省進陝西左轄序

羅洪先念菴

有談吾同年進士挺松柏之資蘊于將之氣聲出若擊石行敏如絕絃施諸人者無問交之故與新也而語必以情任諸己者無問事之易與難也而爲必以力彼雖不以姓名告吾知必爲思菴鮑君君處進士三百人中余蓋望而異之竊謂國家他日有緩急紆憤悍暴萬里外使進士之選見重於明主者必是人也又二十餘年始自山東憲長爲江省右使視省篆立談而積疑亡轉盼而羣情得政譽大起未幾擢陝西左轄將行邀別余文江上質之秀出者莊以瑟氣之鬯達者靜以淵文簡而思凝日營而容蹙噫嘻其果有異乎哉鷺鳥之高舉審所之也其疾擊也先若避之江海不停蓄不能赴千里故其色懼者其動速其言深者其慮專也國家以九邊限夷虜陝西獨當

三之一自古囊敗滅銀

有誤

宥之南稍得耕牧而套中生聚亦十年矣

彼之種類漸蕃此之繕治不豫恃其不來遂以爲無虞此策士日久飲泣者也言者謂漢朔方至上谷道多斥堠亭障虜入無所得率狼狽去兵法請野先堅壁故扞城固爲之役在今最急然當時調發賫餽諸費未知何所給取往年秦中大饑土人遂食無寧宇而無賴子弟往往穴城社爲奸利終南漢遠沔古爲盜藪只伺便待發耳一旦倉卒有所藉口任其怨者誰平癰疽附背而心膂者潰於內也險巖觴目而足戰者奪於外也君去關中幾年再至其地諏咨審矣其計終南安出聞廟堂議將以鎖鑰付君此特借階爾操尺筆走匈奴揚聖天子威德以顯文武同道不令輕生坐辱於悍卒乃君素所注意當復奚讓君昨爲余言年未三十時喜談兵常躍馬投石以爲樂今此意雖未忘然量力無踰人者孫子有言善戰者之勝無智名無勇功君果出於是乎余言驗矣省中東石載君立峯魏君羅村李君少

野鄭君惜君之行以予爲同年在治境內必有所欲告者始至而君別且二日不能忘也遂抽毫敘之

嘉靖二十九年歲次庚戌九月甲子

賜進士及第前左春坊左贊善兼翰林院脩撰 經筵講官吉水念菴羅洪先撰

### 鮑龍山集序

楊循吉 君謙

成化甲辰春三月進士登榜三百人予與新安鮑戶部良用實同年同年之能古文詞者指纔六七屈而不知鮑君之尤能也粵旣第之二十五載君叔指揮僉事懋承甫由杭走蘇介其弟世基委二大帙予前曰茲吾亡姪平生所著龍山集也且曰僕輩行雖叨一日長顧嘗私淑於姪惟其道存焉姪清苦負節槩人莫不知然而年不及下壽而又抱鄧攸之戚賴此編僅存庶或其傳子寧無念也耶因再拜請夫古文詞之弗復亦久矣將非士大夫談者鮮及而習之無益乎

哉且脩辭非難通乎道爲難道通而其中始有植植而後言言必可規則戶部其人乎今之人大抵恥相師至得一善而背其所自者比比孰有忘叔姪之分以資其有且克思報是懋承之義尤不可及也君遷墓有題以見孝送稅使有序以見廉其他雜著有誌狀以見與善之博可謂忠信篤厚人矣由是言之其得於天者視人不旣厚乎集中諸文典贍有法根經而不背於理諸詩亦有意比興翩翩可觀乃爲稍加銓次而歸之或世有同予賞音者而予言亦未嘗不公云君諱楠歛棠樾舊族歷官有聲位止南都員外郎時

正德四年長至日儀制主事蘇臺楊循吉序

### 望雲圖序

章藻功 豈績

嗟乎日雖可愛思逐日以爲難風不曾停欲培風而無自而况姮娥月缺婺女星寒極目天邊都堪腸斷游魂地下那許身從矧六歲以靡依卽百年而何恃扇曾留一涕淚徒然橘若懷三歸遺何所嗟乎

問門閭於此日倚望爲誰認襁褓於當初密縫宛在雖將車高會正  
爾延年而御板閒居邈焉隔世還思刻木彷彿殊難聊且繪圖纏絲  
曷已嗟乎帝鄉安在親舍奚存岫旣出而不還水或窮而未起孤飛  
渺渺生也有涯獨立煢煢望之弗及彼夫煙非烟而蕭索旦復旦而  
光華或爲六氣之調或則九層之望人疑弘景但可自怡我信梁公  
定應反顧雲方叶吉五色曾占雲亦名慈一心且陰而乃輕虛有象  
實體無形膚寸蒸騰偶現當前之境須臾改變難留過去之蹤謂鬼  
化而神收忍言子兩卽柯分而葉散徒託父風詎非爲子而未歎劬  
勞我不如君而克兼敬愛已經雪折痛萱草以難忘未及日垂收桑  
榆而非晚也

本族給貧小序

鮑之公

崑南  
鐵峯

宗廟之設所以妥先靈隆祀典亦以聯族黨惠子孫也吾族自

希大公離徽遷繁卜宅黃山之隴閱三世作廟南向神實憑依漸及

後裔昌熾派別支分無以聯屬之將情渙而誼疎爰是先人各量力  
輸田以資祀品而頒胙之制亦隨以興故祭日少長咸集禮樂雍容  
祭畢而言笑宴宴有眷有倫情誼之歡洽皆藉祖宗之惠有以維繫  
於勿替爾又且尚文章重儒雅科校者有旌闈戰者有贈以逮節孝  
耆老流離喪葬罔不推崇而矜恤之凡此愛所親要皆敬所尊也特  
是世傳廿七人越千餘其間守田園經商賈耕種力作以上慰祖宗  
者無慮也而惟是鰥寡孤獨內外無依窮年戚戚簞瓢未克如意可  
憫孰甚焉亦或生多疾厄遇值災危家口嗷嗷一身蔑由支給傷哉  
貧也所以養其父母妻子者策竟何有哉斯誠祖宗在天之靈時怨  
而時恫者也今與族衆謀欲仰體前人意旨分其餘瀝以徧潤清寒  
又苦公務繁頤所入者之恐不贍也用是於歲暮嚴冬雨雪紛霏之  
際擇其處室最窘者計人口之多寡酌升斗之盈虛稍爲節下饗殮  
之助庶子孫不至闔戶以啼饑而祖宗亦應開顏而受饗矣若夫膂

力方剛不圖貿易不事農桑而逍遙遊戲縱樂偷安甚至入賭博之場溷穿窬之黨敗壞人倫寡廉鮮恥者祖宗方痛之恨之誅戮之不暇而奚惠之與有茲故牽連及之以爲有人心者勸

補遺

棠川詩會序

鮑元康

仲安燕齋

友人彥昭留里中時嘗謂予曰子觀世俗子弟能理財儉家者人謂之才子弟淫蕩不事事則謂之不肖是二者固有間矣至有樂從師友讀書力學則排笑之以爲迂闊是不知其本也夫不讀書而專意於理財其流必歸於不義不力學而專意於儉家其弊有至於忘親何者身不脩也君家子弟獨不然是可尚哉讀書以理財則知取與之分力學以治家則知本末之序吾懼其知之不深行之不篤久而或違焉故於閒暇之時課以詩歌陶其性情以資其脩省之功旨哉斯言予常念之至元五年之冬彥昭亦去而不可留矣其子弟能不

忘其師之言且懼夫詠歌旣廢則涵詠之功缺乃相與每月朔日至月之望日必相與一會詠歌講學以相琢磨涵詠之功不廢而脩省之効有成也是可嘉也是會也倡之者伯源識之者仲安也

棠樾鮑氏三族宗譜卷之一百九十一

記

慈孝堂記

程文以文  
縣南

慈孝堂者歛鮑君仲安所居之堂也初棠樾人相驚有寇至則各逃匿鮑氏之父遇焉執而縛之樹將兵之其子奔救曰此吾父也請兵我父曰吾惟一子幸生之以存吾後我請受兵賊見其父子爭相為死愕然欲釋之欲并害之未知所決會風起藁薄間聲振林谷若甲馬之至者賊以為捕已卒舍去父子因得脫已而賊還無所得恚焚其鄉而去比屋盡燬而鮑氏之門閭獨巋然存鄉人驚異歎曰此慈孝之報也歟遂目為慈孝鮑氏傳其子至孫七十餘年人之過其門者猶曰此慈孝鮑氏家也仲安思懋昭先世之令德懼後之人無所觀仰警飭將墜慈孝以忝祖武故名其堂請予文以記之予讀新安志蓋嘗有感於斯矣昔者聖人之教人也道莫大於慈孝孝者所以

爲人子也慈者所以爲人父也推之家國天下無異焉故曰孝者所以事君也慈者所以使衆也慈孝立而百行舉矣天之生斯人也誰無慈孝而鮑氏獨享其名鄉里稱之君子信之四方與之天豈私於鮑氏而陰厚之邪何其久而益聞也夫人有家父父而子子安居於無事上堂有溫清之奉焉過庭有詩禮之問焉不知其孰爲慈孰爲孝也惟其臨患難而不變決死生而不疑知有父子而不知有其身委性命以遂厥志而慈孝之名立焉慈孝之名立而世教於是乎興矣天其以鮑氏爲訓乎不然何其臨難不苟免而卒以自免也使鮑氏父子不幸而剗刃於盜賊之手則爲善者懼矣且將曰彼鮑氏父子以慈孝蹈禍則誰肯爲之人道不幾於息乎鮑氏父子得生全者天也非幸也且吾聞之堯父慈矣而不得於子舜子孝矣而不得於父顧鮑氏何人而父子具美雖其事甚微而慈孝之本在焉則亦何以至於斯也無亦當時國家德澤涵濡之久我文公流風餘韻漸被

於鄉土者深人人有士君子之行而於鮑氏之事適見之乎推而達之上焉足以事君下焉足以治民鮑氏之後必大所積者厚矣雖然名其堂孰若施之身徵於文孰若見諸事予懼重外而內惑也仲安曰否古之人盤盂有銘几杖有戒豈以內而遺外哉予旣感其事而重其請故爲詳書而謹記之鮑氏父諱宗巖字傅叔宋處士子諱壽孫字子壽嘗爲徽寶慶二郡教授有詩文行世仲安名元康教授孫也其堂則仲安父景曾府君諱魯卿所構其扁則翰林侍講學士豫章揭公侯斯所書噫後之人登斯堂覽斯文慈孝之心不油然而生者吾不信也吾不信也

當載第二

### 婺源朱文公新廟復田記

虞

集

伯生邵菴

爲治於郡國者表先民於百世之上所以正民之趨向而開其教祀於無窮善其父兄君子之所爲所以諷其子弟細民於易從也敦禮節尚名義厲廉恥以變其鄙薄可得而書者今於徽之婺源見之婺

源文公朱子父母之邦也其先吏部在宋政和戊戌以上舍出身調建州政和尉丁艱服除調劍之尤溪歷靖康建炎至紹興庚戌文公生焉亂亡未定浮沉管庫以自給焉同郡張公敦頤教授於劍邀與還徽而吏部公之來閩質其先業百畝以爲資歸則無以食也張侯請爲贖之計十年之入可以當直而後以田歸朱氏癸亥吏部歿張侯以書慰文公於喪次而歸田焉旣塋吏部於建陽丁卯公自建寧舉進士明年登第授同安簿紹興庚午省墓於婺源以其租入充省掃祭祀之用乾道己丑丁母憂淳熙丙申歸省故鄉松楸已見傷於族人矣與鄉子弟講學於汪氏之敬齋脩墓而去宋之將亡徽劍阻於兵族人藏其契券而竊售之又見侵於富民而某邱某方父老猶識朱氏故物之所在也內附聖元將三十年朱氏之學徧天下而朱氏子孫力不足以復其舊五世從孫光訴於浙省閩憲者又將三十年而後兩府以屬婺源守臣前進士于侯文傳始復其宅基於城南

請於朝得旨立徽國朱文公廟於其地則後至元乙亥三月八日也而田則未歸無以爲祭光又以爲言同知州事茶陵李邴之來亦進士也覈得田主名召與之議三分其田償其價之二歸其田之一約雖定價錢無所從出其一亦未肯歸也歛士鮑魯卿聞廟之成也願割私田以供祭未果行而卒其子元康見吏民之紛紛也思成父之志於是賣其私田若干與材木之山得爲中統鈔者一萬五千緡以贖舊田三分其價得元直之二其一則歲收其租而還之滿其數而止旣成約而田歸朱氏之廟矣今奉祀者文公之五世孫勳謀諸守貳父兄邦人請置張鮑之祠於廟側張侯字養正卒官知衡州鮑文學字景曾而其田之畝數與其租入之數錄其券之副而刻諸碑陰云噫孔子之居於魯也蓋有宅焉歷戰國秦項之暴魯人固相與護視之至於西都世之平治久矣諸侯王之世封魯者始欲壞之而其堂壁固在也神靈感之而止者豈其他哉其餘之心有所未安其

其餘之土田周公魯公之土田其餘之城郭周公魯公之城郭也時代雖殊爲其守者爲之主度之廢興則有任其責者矣不然東阡西陌禾易長畝風雨霜露之變匪今斯今何獨於此惓惓乎賢者之所存固有係其沒世不忘者歟張侯經營於文公父子之時鮑君以私財復田於朱子五世二百年之後故鄉之人孰無良心善性哉干李二君可謂知爲政之本者矣傳曰君子學道則愛民小人學道則易使也吾尚有觀於徽之爲鄒魯乎爲之來請記者其郡人懷孟文學程文子在奎章時同館生也

當載第三

### 畊讀堂記

鄭玉師山

鮑生深築室於所居之前爲委績之所暇則弦歌其中名以耕讀請記於予予未有以記也客有疑鮑生者問於予曰畊田農夫野人之事讀書士君子之所以爲學也鮑君欲比而同之不亦難乎予曰噫子之言謬矣夫古之時一夫受田百畝無不畊之士家有塾黨有庠

術有序無不學之人秦廢井田開阡陌焚詩書坑學士先王之道滅矣漢興雖致隆平之治卒不能以復淳古之風而士農分矣於是從事於學者則不知稼穡之艱難從事於農者則不知禮義之所從出後世有能晝耕夜讀以盡人道之常者人至以爲異而稱之其去古道益遠矣鮑生從予遊粗知好古入之道故能耕田以養其親讀書以脩其身使比屋之人皆如鮑生皆盡畊田之力皆有讀書之功則人情自厚風俗自淳雖復三代之制不難矣子何疑焉鮑生進曰先生斯言非記乎請書而刻之屋壁

當載第五

### 聽雨軒記

陳基

新安鮑君尚綱游京師擢官翰林爲脩撰卽其所寓扁曰聽雨軒客有過而疑焉尚綱曰吾家去京師近千里而兩世之親在堂春秋高矣吾不得致朝夕之養者亦多矣昔唐狄公爲并州法曹因使而登太行也見白雲孤飛曰吾親舍其下徘徊不忍去者久之今吾聽雨

於此其於親何如也客退乃以其問答徵予文以爲記夫泰山之雲觸石而起膚寸而合不崇朝而雨於天下也亦何與乎人之親而行役者或登高有所見而思親也如彼宦遊者或公退有所聞而思親也如此蓋人子思親之心無時而不在也登高者見雲之孤飛而適有所感焉爾方雨之沛然也尚綱聽之而念曰吾親之口體或未適於便安乎好樂或未適於心志乎推是類也又何往而非聽雨之時也吾意夫狄公之於役也豈待見雲而後思其親及其立朝而事君又何適而非望雲之時也卒唐之世稱社稷之臣者一則曰狄公二則曰狄公然公豈有意於不朽耶亦曰移孝以爲忠耳今尚綱不能不與公同者豈非以人子之於親一本而已耶况軒之所寓者親之枝也昔曾氏之子一舉足而不敢忘父母今尚綱有曾氏之心哉傳曰聽於無聲視於無形吾知尚綱之心無時而不在新安之里是爲

記當載第八

### 復古軒記

蘇大景元

郡城西北十里許有地曰棠川岡隴回複林木秀茂鮑氏世居其間若隱若仕皆好古絕俗以明經正其家聲常欲一遊願莫之遂天順改元丁丑僕寓程都憲別業與鮑庭謚先生會庭謚不以僕不肖相與扣擊聖賢之學所論簡而明博而要僕有愧焉因往訪先生其弟庭心倒屣歡迎不啻骨肉登其堂爐有焚瓶有插几格朴雅圖書滿前子姪輩皆彬彬有禮藹然古人之風復見今世也酒半庭心告曰復幼失怙賴二兄友愛至於成立心常感之長兄庭玉旣歿之二三年而先人敝廬罹於火然有未燼者存則昔之所謂明讀堂也茲於堂之東朔小齋以爲遊息暇則率子姪於中讀古人書講古人道而名曰復古以勗吾志願爲記之旣受命歸而未果作今年春庭心再書促僕乃告之曰天地日月山川草木今猶古也人獨有古今之異乎今人以古人爲古後之人又以今人爲古要之人有古今而道無

古今焉使生往時放僻邪侈可謂古人乎生在後世脩身踐行亦可謂非古人乎唯其人不唯其時可也觀庭心昆季友愛出乎天性而非矯激子姓循循不違義方惟薄之間融融洩洩孝義之聲著鄉里達鄰邑此非所謂脩身踐行者乎若夫把書看耕閑坐樹陰歌擊壤以樂堯仁功名不入於心黜陟不聞於耳怡然不知日之將暮者視萬天無懷之民又何異哉此皆庭心自得之妙有不待予之言者其先世文物之懿故居堂構之美所以紹而振之者乃賢子孫所當爲又不待瀆雖然嘗聞古之人有身脩於家而鄉閭化之天下後世於斯取法者今則寡焉庭心之勗其在茲乎願因其所已能而勉其所未至以盡此心之誠而不爲時俗所奪雖曰居今之世斯無愧於古之人矣易曰不遠復無祇悔古道將自庭心而復哉當今 聖人在上法古爲治他日求復古之士於林下舍庭心其誰斯時也又當攷治道之古者以爲斯記續茲因其請姑書此質於令兄先生若曰可

卽以爲記且識予願之遂也

當載第十七

### 心田道院記

貝遠翔

景文鮑公建道院於居之南四十里鄉曰長壽里曰葉西新田卽其地名也峯巒環秀川澗周迴庭前脩竹茂林堤畔桃花流水魚藏煙藻鶴隱雲松北瞻嶺岫之巍南望溪山之麗前岡石鼓靈泉素稱奇迹塵埃不入眼人跡往來稀且與宣平故居石耳仙山相望岡遙真地之名勝也公之爲是役也宜矣朔始於延祐戊午幾十年而訖工棟宇一區輪奐具美嚴像設備器用捐田計租八百秤有奇以膳其徒歲有儲以供脩造悉皆佚老之資移以爲此白於有司請於正一教所以心田榜其額易新爲心蓋因其心而得其地因其地而得其名惟其似之是以有之又得以樂之也郡守道議胡公萬戶侯明威公俾延本路玄妙觀提舉汪景紹主領開山師孫程桂茂偕徒孫程若訥住持焚脩自此甲乙世傳晨爇夕炬祝 聖君萬壽表臣子之

微忠且俾遐邇禱祈有所皈依此締耒之本意也然吾嘗釋心田之義畊之不以耒耜種之不以稼穡水旱不我傷螟螣不我蠹而善根仁意之成殆將與實堅實粟同一理戴記曰脩禮以畊之陳義以種之其諸異乎人之田爾田也歟昔后山記思亭曰田從心也今公之名斯院者心從田也二之者乃所以一之也他日子孫游於斯息於斯禮畊義種家傳世守出而事君盡忠入而奉先盡孝行遠垂後以盡其道凡此根於心者莫不益廣其思俾住斯院者心心相印田田相繼傳之未遠可知也公名周字景文家於歙西之棠川薌林其自號繇生父郡博士雲松翁種德而耕學之公能肯播而仁穫之心田之傳其來有自幼在襁褓生母見背叔祖妣吳躬親撫育年十二父子善翁奇之命歸其後事親盡孝不幸蚤孤應門艱關惟以勤儉增裕先業學行受知儒臺檄教鄉邑未幾以侍母疾辭歸服闋不仕味儒立旨趣自肆於山澤之間僉事善之鄧先生分憲是邦聞而嘉之

爲校正所吟詩卷目曰薌林小橐年將耳順朱顏綠髮綴我壽祺嗣若徐卿經訓弗墜長嫡復以蒙古字筮仕齒爵固未艾孫枝列秀代不乏人積善餘慶如此不有心田之夷坦其何以致乎予於公爲世戚幸公之有成爲公樂之故得以記其詳泰定三年歲丙寅九月朔日記此記當首載

### 鮑氏遺筆記

鄭汝庭迪簡西坡

鮑公相字必成歙之文獻大家也其先自晉太康間由青齊遷居於歙凡四遷而爲今居之棠樾世以貴雄郡邑而尤以儒鳴累葉相承咸慈惠鄉里以長者稱先世有諱壽孫者當宋元之交父子遇寇爭相爲死寇兩釋之事載宋史人稱慈孝鮑家高祖景文先生嘗教諭鄉邑以詩鳴有薌林小橐行於世曾祖靜軒公由全州學正歷官泰寧縣尹陞會昌同知善政遺愛數之不能終因時中微不獲究所蘊祖山長公隱居不仕以文章道德爲當世儒宗學者仰之如泰山北

斗父翰林公以聖賢正大之學發為忠言嘉謨鏗鏘廟廊間而文采  
照耀於後不幸為仇中傷而報國之心垂死不變君幼孤事母以孝  
讀書樂道隱居於家念手澤之不可忘也蒐輯先世遺筆裝潢成軸  
命汝庭記之汝庭之慈親即君之姑氏也凱風渭陽之義實鍾厥心  
因不愧蕪陋敬敘述行事如此以不沒其實雖然亘古今而不可泯  
者天典民彝是也是以人雖至愚語及忠孝事輒咨嗟歎息以為不  
可及甚至流汗浹背是豈自外至哉蓋與生俱生者然也若其先世  
之父爭相為死高曾之以所學政績聞四方祖山長公以道德為  
當時學者師而翰林公以忠肝義膽雖死不渝其聲光赫然貫乎穹  
壤雖行道之人至今即其議論遡其風采仰之望之如景星慶雲如  
朱鳥素麟愛敬之心油然而生自有不容已者而况子孫之遺筆哉  
宜乎君之有是舉也嗚呼昔有厥父播厥子不肯穫厥父作室厥子  
不肯堂而又矧其手澤乎記曰致愛則存致慤則著詩曰未言孝思

孝思維則唯吾子有焉公年方四十有三子長女英醇謹能繼志次  
玄寧雅飭好學有乃祖風三玄復尚幼岐嶷絕人可謂孝子不匱求  
錫爾類者矣當載第十

燕齋記

鮑元康

仲安

予於居之東偏別治一室廣盈丈許中設三榻列四直扇塵香鼎素琴  
與夫養性之書澹谷墨魚畫幅二貯花瓦壺一耳目聲色之玩不與  
焉事間則入憩其中扁曰燕齋夫燕齋閒暇之居也余方盛年正當  
苦心勞志殫思竭慮惜分陰以自力乃不於是乎取而求暇逸之所  
豈宜也哉蓋懼年之方壯血氣方剛心志未一不趨於正則趨於邪  
不趨於忠厚則趨於刻薄入彼出此則君子小人相去毫髮而禍福  
遠矣是以應接之餘入齋端坐追念已行之迹某者是某者非某者  
忠某者薄庶幾不遠者可復而入乎君子之歸矣予之於是齋也蓋  
養乎靜以察乎動非專於靜而忘於動也然則燕齋者燕居如齋也

豈所謂宴安鳩毒之云乎懼夫或者不知其意以予爲求於安逸暇  
豫而忘夫學者故著其說以自解而書之齋壁當載第四

慈孝堂記

陳彥回士淵訥齋

父子有親五典之一也天性也家之大倫也自世教衰民散之後處  
常能盡其道者猶難其人况處變而能不失其本心者豈易得哉歎  
右族棠樾鮑氏佳子弟有曰繼與恆者持慈孝堂詩卷并錄宋史孝  
義傳拜予於寓廬讀之知其五世祖諱宗巖字傳叔傳叔之子諱壽  
孫字子壽丁宋末盜起里中宗巖避地山谷間爲賊所得縛之樹上  
將加兵刃壽孫拜於前請代父死宗巖曰吾老矣僅一子奉先祀豈  
可殺之吾願自死盜兩釋之於戲當是時也使父執而子弗救則父  
死矣子求代而父弗爭則子死矣或者盜賊冥頑則父子俱死矣子  
唯不忍父之死而不自知有其身父唯知不忍子之死以絕宗祀故  
寧殺己身而不悔非深慈篤孝行於平日一旦發見於顛沛之際能

如是乎父子俱免固所幸願也有如不幸賊殺其父吾知其子之心  
不能以獨生賊殺其子吾知其父之心亦不能以自存有一於此又  
不若俱死之爲安也父慈子孝之天卒然行於患難之變真誠呈露  
無一毫私僞而不失其常者鮑氏有焉然厥子愛父之心卽厥考尊  
祖敬宗之心爲仁之本其不在茲乎兩釋之之盜亦義之所感歎書  
曰至誠感神况於人乎雖然茲事往矣其慈孝之心見於家傳者勿  
替引之今非繼恆其誰歟若夫處常應變各盡其道亦惟時措之宜  
不必滯於跡之卓異奇偉也因並書於卷末以告當載第九

存愛堂記

韓忠問齋

古今論人道之大必本乎天子之仁所謂天地生物之心而人得之  
以爲心者也故先儒以本心之全德訓仁又謂仁者愛之理愛者仁  
之用又謂仁主於愛愛莫大於愛親故人子之於親必存其愛焉所  
謂存其愛者夫豈勉強哉實乃天子之仁發於心而不可泯者也古

歎鮑氏有字時明者今棠樾處士文芳公之三子也博學好古有高  
尚之志甫自弱冠歷游江湖所過國人之賢者多與定交往來於汴  
熟甚一日持卷謁予詳道其家奉親有堂扁曰存愛嘗荷 周藩賢  
王賜篆門楣大夫士間有聲詩歌詠之矣然未有記之者敢干先生  
一言以發其義俾益加勉焉實幸幸也余嘗觀鮑氏謚齋隱君所脩  
譜帙顛末知鮑氏之先肇慶發祥植善培德其源遠矣夷攷奕世以  
來詩書禮義之澤播於家聲慈孝行誼之實載之信史其他行道以  
濟時者有之居隱以善俗者有之宜乎族派之蕃衍而子孫之多賢  
也其有不知存愛之道爲親親之仁者乎竭力善事以致其孝致其  
孝者存此愛也出告反面以致其敬致其敬者亦所以存此愛也愛  
親之心旣無時而不存則人子所以謹其身者亦無時而不致其力  
矣所謂非禮勿視非禮勿聽非禮勿言非禮勿動脩身養德而不貽  
憂辱於其親敦仁樂義而能繼慈孝於其祖殆見兄弟翁和親心悅

豫大道行於家而仁風化於鄉夫然後賢王大篆之賜爲不虛則存  
愛名堂之義爲有徵矣若稽古聖人之孝無踰於大舜賢人之孝無  
踰於曾子其爲法於天下可傳於後世者亦豈外此理哉故孔子云  
立愛自親始教民睦也又曰因親以教愛孟子謂孩提之童無不知  
愛其親又曰親親而仁民仁民而愛物是又不特能存其愛而又擴  
充其愛也鮑君時明其篤於仁孝而有志於擴充也歟余耄且拙特  
樂其善固不辭而爲記云

天順元年歲在丁丑秋八月旣望河南庚子鄉貢進士直隸鳳陽府  
儒學致仕教官祥符韓忠景賢撰 當載第十二

亦政堂記

當載第七

鄭

玉

師山

鮑觀兄弟久從予遊孝友之譽聞於鄉里亂後築堂以奉其親請名  
於予予取夫子之語名之曰亦政復請予記未暇作也及予拘囚郡  
中就死有日觀拜且泣曰諸生游先生之門莫不獲文字之寵他日

尊所聞行所知猶侍左右也觀不得一語以自警死且不瞑子孫將有遺恨焉先生幸哀之余告之曰子之奉親而居是堂也父父子子兄兄弟弟夫夫婦婦刑家而化於鄉是亦爲政而已矣奚必食君之祿治民之事而後爲爲政哉子兄弟其勉之斯爲不負予之教矣觀弟名偕其尊府君名葉字君茂蓋老友云戊戌七月二十五日某記

遺筆卷後記

當載第十六

陳文璧

正統七年歲次壬戌孟夏之初歙州巨族鮑君復持其先世高曾祖考手澤一卷示予祈言表識之披閱無慮數四若詩若文皆古雅可人意至翰林公不特詞翰精緻其忠義孝慈藹然的然有不覺令人撫卷吞聲而太息者彼鄉先輩鄭公汝庭已記其世系事實殆無餘蘊予復何言哉噫君子樂道人之善分非過當矧鮑君閱簪纓積德垂裕累數百祀綿延繁衍光於前者名宦膺士世濟其美承於後者淳厚詩禮不墜家聲觀其於祖宗遺澤寶而藏之不啻卞璧隋珠

遇搢紳士大夫輒上謁請表襮之則其所存者可知矣昔曾子臨終戰戰兢兢啓手啓足恐傷親之肢也今復昆季於先世手澤尚珍護如此其重可謂知所本而有終身之慕者矣况虧其體而辱其親者乎愛其親則愛其身愛其身則善無不爲善無不爲則德日益進而慶日益長吾將見顯融之來光前裕後自此基之矣復勉旃無怠焉

復古軒記

陳賓

余旣謝歙縣政之二年邑士鮑復庭心遣其兄子儀不遠數百里來請余記所謂復古軒余識庭心讀書秉禮不伍流俗世以儒業相承余固不以凡民待之而遠以言請又可以孤其意哉乃爲之言曰甚哉古道之難復也爰自大樸旣散結繩莫施人僞日滋天理日斲所謂道德學行皆隨時趨靡咸不古若矣孔子論當時之弊則必追慨乎古其謙已以教人必曰好古敏求然則古道之爲尚可知居今之世而欲復古之道自非超俗邁常卓然有識者不能也庭心日處斯

軒凡所存爲必思所以去僞而歸朴變漓而返淳言非先王之言則弗言行非先王之行則弗行居服用非先王之制則弗居世方趨時徇俗以爲能而吾則惴惴焉必循乎先王之法程世方詭遇巧得以自矜而吾則規規焉不違乎先王之準繩是雖不敢以上擬乎前古亦庶乎不混混乎俗情也且余審鮑氏之先世多聞人當宋季時有以父子爭爲寇死亦爲慈孝者載在信史其間或隱或仕以政績著於中外以惠澤流於鄉里者歷歷可紀至庭心尤能勉於爲善凡可以利及於人者則出貲力以勇爲之又非所謂克紹先德善復於古乎遂爲書之俾歸而揭之軒壁

當載第十八

### 大和社記

趙 府 前 紀 善

同邑唐子儀撰

賜進士出身上虞知縣

同邑鄭行簡書丹

吏部郎中兼經筵侍書

華亭夏衡篆額

古昔帝顓頊之子勾龍氏能平水土九州奠安祀以爲社周祖后稷教民稼穡萬姓粒食祀以爲稷禮所謂有功於民則祀之此其大者也歎之棠川鮑氏之宗居之風俗淳厚談詩書悅禮義人人有士君子之行當宋季之俶擾盜起里中執鮑氏之父曰宗巖者將兵之其子壽孫出而救之子願代父死父願代子死賊義而兩釋之人稱慈孝鮑氏事載宋史里以慈孝稱亦由是焉鮑氏嘗率里人建社於高塘充地形散漫風氣疏泄民居弗靖洪武壬申衆謀移建於棠川之村口而其地則慈孝之四世孫汝欽五世孫必成兩家之己業也族衆於是踵門告曰子之先世嘗有功於民子誠不忘先德以己地爲社神之居俾里民徵其餘福可乎汝欽必成咸諾之於是繚之以垣墻義之以屋宇風氣完固居民阜康衆悉宜之且以其族之鄉先生曰仲安曰伯源曰伯尚者昔嘗立社倉以濟貧乏保民於患難者其功爲多又嘗舉鄉飲酒禮以孝悌禮讓化率鄉人足以垂訓因附祀

爲於是其族之人有字尚賓者遷居北鄉有年矣觀茲而有感焉乃以其故鄉遺田壹畝半俾宗人均其稅而收其入裨祭祀之用所以表不忘所出之意焉越今四十年屋壞壇圯無以稱報祀之意其宗人有曰文紹曰者復率族衆經營斯宇規模壯觀視舊有加焉以謂事之顛末弗刻堅珉何以示後乃礱石光瑩徵予文以記之昔唐韓愈有曰願爲同社人雞豚宴春秋又曰古之鄉先生歿而祀於社何昔人之存歿皆注意於斯豈非盛典所繫爲衆姓之所慕歟所以後之君天下者立國社國稷推而至於鄉里或千家或百家或三五十家皆立社稷以祀享之春有所焉秋有報焉當事之際必備牲醴列庶羞瀝誠揭虔以致敬於神毋敢怠忽蓋爲民生之敬仰出於至誠此天理民彝不待勸勉自有不期然而然者矣今鮑氏代不乏人乃能始終追念於斯既有以崇報功之典又不忘鄉先生之德俾後人知所法式是可尚已乃不辭而書之

宣德六年龍集辛亥正月十五日立

其壇壝有未備者越五年文芳得輝率衆完成

當載第十一

大母塲記

周原誠 石泉

靈山之下飛流噴薄蓄而爲塲者非一而大母塲爲最鉅上距靈山十有五里下溉田者六百餘畝然當橫波怒折之衝里人雖歲斬草築石爲堰而往往蕩射殆盡隨而葺之所蓄無幾歲用大侵而民致勤恤者舊矣乃庚子冬里鮑君伯原慨然新之而揭己爲倡率夫田之受溉者庸粟有差卽石址結石塚二東袤二丈九尺西殺之高一丈二尺中爲梁橫亘五丈三尺高二尺竅其中豎木置牖而時其盈縮者九由是水之暴怒有歸澄綠無洩而望者咸知其可以永秋矣明年春告成里父過余求記懇懇且曰是役也君從弟以仁首事甚力而又有以濟其終者焉嗚呼井田廢而水之利在天下智者舉其利以澤乎民而民懷之不忘此固吾之所慕也伯原是舉坐收數十

年之曠弛而遺利於無窮斯固澤之被於一鄉者哉以仁瞻瞻於斯終始弗倦其亦知所致力者矣夫厚生利用斯民之所急也急乎民爲君子之所存也利之施而報之隨此人心之所以不泯也吾於是故嘉里父之請而書之以勸於來者伯原昆仲舊學於師山先生而勵志於範時興化故於茲克有以著其耿耿云是爲記

元至正二十一年歲辛丑夏四月戊申歙周原誠記

當載第六

誠孝堂記

劉 戩

歙人棠樾鮑君燦字時明事其母夫人余氏克其孺慕之天而竭其可爲之力信於其家及其鄉黨州閭而達乎縉紳士夫余氏夫人年七十有奇忽疽發於雙足熾甚經年益危殆閱名醫數人皆盡其術而不加損時明計不知所出乃焚香籲天每旦吮其疽雖穢腐不可近如卽美味久之勢漸衰淡旬遂愈衆以爲孝感所致而攻吟咏者復從而歌頌之於是監察御史唐君希愷謂有補於名教甚大遂以

誠孝名其堂而屬予紀其實俾有聞於末世予聞孔子曰人之行莫大於孝而先正以爲反身不誠則外有事親之禮內無愛敬之實孝之貴於誠也尚矣顧嘗脈脈而思之誠之得名本以實理理之所有者誠於此而動於彼固其所也昔之言孝者如泣竹之生笋卧冰之獲鯉舐目割股之愈疾皆理之所不宜有者無是理而有是事誠之所感固如是乎豈一念之誠貫徹融液如元氣之薰蒸則雖窮冬寒沍亦足以致草木之花實乎時明之吮疽蓋與舐目割股者同科故雖軒岐之所未道俞扁之所未施伊尹雷公所著藥性之所未有而其愈疾之効與泣竹卧冰異事而同感宜乎士君子喜聞而樂道之也予嘗以爲君子之於善猶小人之於惡皆無所不至者也戰國之時有吳起者貪功名戀爵祿至爲士卒吮疽而母歿不臨竟見絕於曾子以起之才苟移吮士卒之疽之心以事其母則養志之孝曾子當不得專美於前豈至於見絕也哉然則時明固曾子之徒歟哀哉

若此輩其心不如禽起之見於歌詠者然也而時明爲士夫所頌乃如此善善惡惡萬古此人心自取之耳是爲記  
成化乙巳秋八月既望  
賜進士及第翰林院編脩文林郎安成劉戩撰  
其命誠孝堂記  
歛人鮑燦爲其母吮疽已而疽愈人以為孝將暴其事於官鮑君泣止之曰夫安有爲母吮疽而求名者邪江西劉編脩聞而義之曰是  
可以爲誠於孝矣於是名其堂爲誠孝之堂著爲記鮑君則又泣止之曰是奚足爲孝邪而以名吾堂竟辭不受鮑君既卒有三子長曰光宇次曰光祖季曰光輔相聚哭而謀曰往予常忿吾父有首善之行而卒莫之聞也夫閉而不暴者孝之忘也必舉而旌之者官之事也故君子之揚人善也不以其自閉而弗行不以其炫而苟與同何也聞其實則觀者易化此風勵之道也今官司計不出此徒使吾父

李夢陽空同

當載第  
十三

幽幽而弗彰含章而喪亡且夫悖莫大於忘孝罪莫重於泯親父行不聞時子三人之辜於是光宇使二弟相繼如京師暴其事於官乞旌其門閭官曰法孝子死不旌卒不行二子則彷徨於路衢行且泣誦說其父事行路爲之灑涕歸相聚哭又謀曰夫不可強爭者法也可以義起者禮也緣禮以伸屈援義以附情庶幾名實有徵父行不泯於將來於是始葺其故堂而仍厥前名曰誠孝云其婚姻家有曰鄭庚者尚德人也見三子能成其父志而竊大喜至大梁告我以顛末請記子驚訝曰異哉劉子之名人之堂也夫孝猶有不誠者邪孔子曰父子之親天性也今世俗率喜務名故其性鮮附實即如割股廬墓嘗糞吮疽此何等事今人爲之大抵欲彰其孝名夫急名鮮實行務外多詭心今既欲彰其孝名矣則所謂天性者安在乎及幸而致名輒日夜望旌其門閭顯者圖進用庶人華厥身有如鮑孝子吮疽而疽愈反自閉其事者乎又有如鮑子人以嘉名名其堂力辭

不受者乎若是卽以誠孝名其堂奚不可者而俗人不領解輒相妬  
不見容私毛舉過失沮壞其嘉懿曰此於法不得旌者也豈不大可  
詫耶鄭子又曰鮑氏先有鮑壽孫以孝聞載在宋史人呼其所居里  
爲慈孝里子曰詩云孝子不匱永錫爾類今觀鮑孝子吮疽又觀三  
子能成其父志非其先有遺烈哉

當載第  
十四

### 宗老會記

李夢陽

宗老會者會鮑宗之老也鮑宗之老當止德五年年七十以上者八  
焉八十以上者四焉九十以上者一焉凡四世爲一會會起於鮑時  
瑩初時瑩約曰會非七十者不與鮑以潛時瑩從子也獨非七十與  
蓋凡十四人焉其約一年四會會於清逸亭亭有四時之花每花開  
則會輪流而主辦蓋三年半一週焉其坐同世則論齒酒肴足而已  
明年菊木樺開適時瑩主辦而十三人者相逶迤來皓髮長眉各服  
其冠服有幅巾者有壽而官者有義而官者就筵觴行歌伐木頌弁

之章時瑩又約曰飲者不辭不飲不勸言母及家事母及邦國時政  
而諸老者雍雍于于於一亭之上古貌色愉動止有度言語有則望  
之蓋若畫圖焉旣夕有風西來汎叢鳴林吹菊桂之香撲尊襲衣而  
諸老者各簪花滿頭顱離席遊吟三三兩兩或弄琴書或摘芳蓀徙  
倚於軒楹之間翱翔於莎徑之側蓋已皆醺然醉矣時瑩顧謂之曰  
諸宗亦聞民壽觀國身壽觀人乎衆皆曰何謂也時瑩曰設今差役  
繁苛四海有警或水旱疾疫澤涸無魚夜犬頻吠雞豚牛羊不育吾  
儕有今日之樂乎衆皆曰無矣時瑩曰設吾與諸宗不理於身家生  
計窘鞠子孫不肖日奔波氣惱虧損神志又能有今日乎衆皆曰無  
矣時瑩曰今吾與諸宗幸生長太平之朝又幸能自理於身家可無  
醉乎衆皆曰諾於是各以酒觴時瑩酬其主辦且以報言也其事聞  
於李子李子曰前有會者香山九老洛下耆英睢陽諸老耳成化間  
則有南京壽俊之會四會者古今稱難焉然非同宗也又咸謝仕而

閒與當官而壽者以今歛棠樾鮑氏觀之不尤難乎我聞之曰國泰壽民人泰壽身鮑氏諸老之謂哉

正德六年秋九月

賜進士出身中順大夫江西按察司副使奉

勅提督學校北郡李夢陽撰

當載第  
十五

龍山廟記

鮑泰希止

龍山廟在歛衮繡鄉棠樾之左蓋衮繡爲歛名鄉山水會勝棠樾擅其中里曰慈孝去北槐塘里曰狀元稠墅里曰繡衣南則西溪雙橋里曰貞白是皆因其人有其德業以名其里泰鮑氏家棠樾傳九世府君諱壽孫當寇亂以父爲賊執縛於龍山之隙將兵之而馳往請代父死父願自死爭相受刃隨刻山風發號駭震林谷賊相顧驚愕而兩釋之事載宋史欽沐我成祖文皇帝表入孝順事實所謂慈孝里也曰龍山者以其蟠蜒高陰棠樾地左之謂當其風號賊散顯

有神攝鄉人異之因相與卽其巔設壇祭禱隨感隨應而廟以立焉廟負壬面午躔應南丹鳳凰赤道故其前山之麓地曰赤坎里名鳳池棠樾人歲春秋兩祭於廟以藉神庥廟當元季燬於兵復創於洪武之庚申爲正堂三間右爲通真壇屋一間兩翼門廡住舍盈列有差而祭會分祀越國汪公暨諸廟食土神尚矣質之於邑孝女鄉雙廟祀唐章預二女史書其搏虎救母旌而祀之曰孝女廟先子常以其事追念先世未有知求孝女例爲孝子廟而徒爲龍山廟也以帑購取廟東山業五分付廟吳伯通領之將申其志旣卜於地勢有不可因者而止迨至成化己丑歲重造廟三門兩廡癸卯營脩正堂壇屋堂後造屋五楹爲後寢稽諸庚申之創莫識前制面午乘壬有相合之義改向己丙乘犯不經而神不顧歆者半矣當茲旁緣造修僉弗克傳而咻從舊貫不得治其方位之乖爲識者慨待後通造之來氣運之復則必於斯言酬之信乎名鄉山水之勝鍾於人寓於物垂

之於千古而不泯也先子子壽公六世孫著有辨正天原發微書泰  
無似謹述其事記於石

鮑孟英

惟醇  
瞻魯

天啓丙寅孟秋望後一日里中宣言有櫬在堂其首忽茁異葩族人  
以其事駭聽也咸往觀焉四方聞者麋至余聞而疑之旣而諦視非  
芝非菌附櫬首左墻生其根之潔如玉盤盤中起莖長三四寸許皆  
曲而上出色微綠有紫斑莖端著花如蓮房頂平色白瓣凹而邊紫  
或著葉如蓮葉色盡白凡十餘本又旬日之間三開三絕同時來觀  
者咸問此誰之櫬里人曰鮑氏叔獻之櫬也子四客於外今侍膝下  
者季子敘廉也因問廉何如人曰其父嘗患目癭蔽明醫不瘳季爲  
吮之膿去而癭愈父又患痿痺手足不能持行季獨躬進飲食負之  
臥起無間晝夜寒暑四年如一日其間父病將革者三季三割股進  
之里族稱孝焉及乙丑冬父竟不起廉幾以身殉雞骨支牀因思慕

不已留櫬在堂至是乃茁此異葩云於是觀者咸嘆息去余曰此非  
空言無事實者比也作異葩三茁記

### 重建軟橋碑記

歛聚萬山四面迴環而靈金環迴於內靈金之山九腦纏澗而棠樾  
澗纏於西春夏之交山水暴漲洪波難馮秋冬乾涸沙草披靡高低  
莫辨雖非舟楫通行而實往來要道軟橋之設所由起也起之者誰  
自前明從遠公也澗之厓壘石以爲基澗之中疊石以爲堦堦之上  
架以巨木木之上平以石版故名曰軟橋然歲久欹傾東西之行過  
者如臨深淵惟恐隕墜而更苦者吾歛山高田低苗之種於田中者  
雖以屑角毛羽蒔其本根而全賴石灰及夷蘊崇焉是物也產於飛  
布之崖一時之轉運於此者任重道遠窮日之力而不能赴其家又  
加之以病涉則潰敗不可復收歲壬子右涵自楚歸目擊眉皺向輔  
周言曰軟橋不脩奈何輔周曰此吾父之所惻然也右涵曰約計其

費若何輔周曰橋之起由來久矣前之人屢屢脩之其所以數圯者木朽也更之以石則千百年不廢私心竊計之非二百金不可右涵曰二百金易易爾叔肯職勞我當任之輔周曰如此則事辦矣於是鳩工人飭材料取礪取鍛擇日興工錘幽刻險通道開山越數月而橋告成橋之長通計五丈橋之廣通計五尺橋之洞通計三塚橋之梁通計十二每一梁之長各丈七尺其一梁而推挽者或數十人或百人厥工若干工厥石若干石而往來行人與農夫之負擔者咸色喜藉藉稱道焉不止蓋右涵之有斯舉誠善矣或曰吾鄉之廢弛者甚多備記之以爲後之力行其善者勸有請易以橋名者右涵曰名仍舊以繼前人功德也

皆

雍正十一年歲在癸丑夏四月本里族衆公立勒石

棠樾鮑氏三族宗譜卷之一百九十二

詩

五言古

題慈孝堂卷

陳賓

孝慈本天性孰克全其真寥寥曠世下乃復見斯人危哉臨刃際惻然大義陳正氣感皇天至誠孚鬼神彼寇獨何心以仁感不仁遂令父子親各得全其身勝事激流俗高論動儒紳雲仍獻遺蹟撫卷嗟歎頻

訪鄭師山

失名

皇圖啓明運曠士遂幽期豈無及物念行藏應有時庭空不受暑槐影何差差柴關掩清晝谷鳥鳴低枝悄悄林中景逍遙雲外思徘徊未能已感歎正在茲

又

皇風久不作王度日摧積炯炯素王心千載重悲哀於今慨云遠遺  
旨生疑猜所幸大法存星日臨九垓先生閉戶意編絕多餘埃殷勤  
白頭志著述期方來二詩舊載注公仲魯次韵寄鮑仲安七律後失  
書名攷述文翰名士注公僅有寄仲安公一詩

題安素軒

鮑汪如思齊

區區環堵室熙熙安素人讀書希古賢畊田養吾親顏巷爲我里賜  
墻爲我鄰蕭然四壁立中含太古春達則善天下未達善一身於道  
苟無違何憂長賤貧

題安素軒卷

李源宗一

窮達有定分豈容着人力云何夸毗子怨尤肆反側屯晦不自持榮  
利競滄滄頓令周道間茫茫塞荆棘洵美鮑君子自將唯惠迪世間  
紛華味曾不介胸臆不陵亦不援唯以蓄吾德旨哉正鵠訓服之無  
厭數慙予道未聞俯仰常惻惻讀君安素吟古道照顏色

題復古軒

趙璉

壯懷涉遠道伊洛與鄒魯出視郭北門徘徊一何主捷徑競紛紜周  
行被榛蕪叶音舞發軔失所從溷濁穢泥土擾擾路傍子動息非我侶  
梁肉鄙顏巷高堂隘環堵鄒魯日已遠伊洛轉脩阻迴鑣循故轍驅  
馳範良父停驂發笥焚香禮魚蠹叶音胡先正多格言遺經足繩矩  
靜參古廟祀貴賤誠可覩立酒用在室醴醖置之戶美哉滕世子大  
哉宣尼父禮樂從先進喪祭遵遠軌矧非賢聖資事胡不師古高居  
揭華扁斯道豈無補慎勿負初心塗人可爲禹知德鮮克舉奇爾庭  
心甫袞袞塵囂中湍流見砥柱

贈鮑孝子吮疽詩

王珣

人少慕父母漸長因物移孝哉鮑氏子大舜爲其師蚤年失所怙蓼  
莪有餘悲非堂老慈親色養常弗衰一朝患癰疽百里無良醫丹元  
訢皇穹旦暮口吮之寧較甘和苦惟知母與兒至誠動天地冥冥自  
扶持厥疾旣已瘳况復臻期頤念茲誠孝心而今更其誰佳名傳太

史亦爲萬世規

吮疽詩

沈庠

棠樾有奇士篤孝出天真晨昏盡定省奉養事必親母忽遭毒疽驚  
惕誠苦辛求醫罔獲効顛天勞諄諄所願無他詞惟欲代以身毒疽  
口自吮且且寧辭頻頓令親疾愈曾不待淡旬蒼蒼信有天冥冥豈  
無神異日孝行傳安能遺若人請看庾黔婁百世名猶新

吮疽詩

韋斌

壽夭固天定禍福從人求脫無默應者脩德淪虛謀卓哉鮑氏子醇  
孝誰能儔萱花老堂背疽足幾凋秋恐恐顛天地自吮還自尤豈不  
聞臭穢直欲期親休神物詔遐祉而患隨以瘳此念渝金石真誠貫  
斗牛名當續季路行可埒黔婁明日觀風者操觚定與收

南浦詩

唐龍

縈回南浦曲淳源澄且漣鳧鷺白皜皜菱黃青田田洪橋曝魚鬣飛

瀨揚蛟涎誰結隱者居黃茅蔭重簷枕石濯長纓論流張素絃野老  
互容與揮觴并繫鮮兀坐醉不醒醒已醉依然何須問蓬海蓬海在  
人間

孝徵詩

都穆 立敬

至孝通神明仲尼不我欺古人叩北辰親疾隨愈之孝哉鮑氏子事  
親履其危親病日以劇秦越功無施徬徨顛立漠願假神匡持俄頃  
昭默相沉痾頓然辭感恩心獨耿裏糧陟崔巍飄忽風雨來雷電相  
掀箕少焉豁中天雲際彰神儀子仰巖控首衆駭稱爲奇謹言爲孝  
徵微子其能斯具告君子儒請宣歌與詩垂之百千祀永爲人子規  
予嗟大朴還純風漸澆漓唯孝本天性所盡何幾希神足重立教示  
端由子基天人有相感於理無背違子其不信怪何以化庸愚

贈鮑演

二首選一

李夢陽 獻吉 空同

我愛汝長子遠志日超忽浮雲似其心秋水清到骨縱酒見天真探

桂遲月窟攜手眺大野滄波杳出沒

鮑氏世家

鮑紹激 良濟清川

祖居東郭城五喪來西營四世居美公開村創業成提幹登仕郎卓  
哉雙弟兄再生雲松翁漕解冠羣英父子遭亂寇慈孝能全生從兄  
稅課使定寇松原平二子教邑庠薊林與魯卿賓貢文益翁領邑未  
及行靜軒作縣令無吏催租徵山長子脩換或或起文聲燕齋與謚  
齋鄉黨稱先生嗚呼時明公吮疽旌孝誠龍山歷禮戶芳名動兩京  
幾豫借畏齋儒林宦况清尚義號純菴濟邊千金輕思菴豸薦冠驄  
馬巡南行東井領州牧民間無訟爭同知老歸閑訓導官亦榮激也  
晚宗生作詩傳令名

題贈孝母鮑老安人

蔣繼軾 蜀瞻

峩峩黃山高涓涓武谿清千載大賢里婦德秉靜貞安人名家女動  
止協禮經婉嫕事舅姑天性孝且誠悲哉寇氛熾夫從舅遠征豺狼

滿城邑負姑山中行倉皇天地昏出與白刃迎白刃逼姑頸蔽姑與  
寇爭爭以身代姑血濺裙裾腥皇天閔孝婦默令賊刃停匍匐脫鋒  
鏑還家無完楹辛苦營甘旨患難痼疾成猶恨孝養缺身死目不瞑  
吁嗟兵戎會臨難誰捐生苟免棄君父節義鴻毛輕大孝讓巾幗名  
教樹干城載筆光青史允作閨中型

題鮑安人

吳瞻泰 東巖

無非復無儀葩經傳婦行脫遇強暴侵徒手難畢命至孝本自天臨  
急膽先定鮑婦弱齡時倅際紅巾橫豺虎晝搏人林谷鳥聲靜扶姑  
避出門青犢要山徑白刃及其姑姑首焉能硬血與淚俱流請刃婦  
為正寇哀而舍之弱肉脫檻穽婦存姑與存孝感化梟獍巾幗有斯  
人丈夫宜敬聽倘從娘子軍亦師忠且勁婦貞作母儀此堪為內政  
編續中壘書孝行應最勝

題西枚學長兄望雲圖

沈德潛 稿士

登山望白雲天高浩茫茫白雲何從來安知非故鄉白雲在天上慈  
親在泉下自傷無母人悽焉淚盈把幽宮近黃山鬱鬱松楸樹望望  
天一涯難逐雲俱去白雲有時散兒恨無時衰天空雲盡處終是思  
親時

題鮑璞齋先生傳後

韓彥會

瀝芳

韞玉恆抱璞識者吸其精明珠沉深淵光華久自徵偉哉鮑君行慰  
我懷古情所以聞鉅公貽之金石名宗伯人倫鑑發語韶濩鳴上俞  
九重聽下垂千載衡倚維我祖德存歿被 恩榮宗伯更上請  
天章輝日星豈云阿所好幽顯期畢呈採風懸車日搖颺漸江旌簪  
筆紀風土憑軾詢老成歛人連一口鮑氏有耆英七十舞斑衣怡怡  
捧兕觥百行敦淳篤孝子錫類宏挾纊恥獨暖嘗臙快分羹不識阿  
堵物諾重千金輕鴻離泣解網鮒涸賴重生覆翼烏雛哺纏絲宿草  
盟心力亦云瘁慷慨獨支撐橋斷嗟脛圻巢焚憫尾賴坎離咸既濟

同人屯復亨客楚稱君子歸里迪後生葺祠新俎豆勤學樹庠黌平  
生惟嗜義金盡志不更出山黃山暗居山黃山明而今不可作誰歟  
揚燈仰宗伯式車聽矢口響噲吟汝曹典型斯斯真古老成厚力如  
鐘鼎積德比瑤瓊獨行誠不惡游俠豈足并斯人情云逝聆此淚縱  
橫歸來頻歎息玉管發晶瑩余讀鮑君傳字字聲琮琤鴻文琬琰重  
幽光雲漢清他年標青史備之傳芳聲

題璞齋鮑先生傳後

蔣元益

希元

西京重孝弟任俠安足名東都敦氣節文學愧苟營世風久不振望  
古空崢嶸蜀源有君子好善本性情弱齡特穎異器識邁老成讀書  
勵操行貨殖恥將迎既壯志益堅持身玉琮琤千鈞然諾重一笑肝  
膽傾解橐排友難披胸露精誠黃金衆所趨揮若鴻毛輕餘澤遍桑  
梓義塾開家黌薰陶鄉子弟學耨而禮耕卹災法良苦肩任心忤忤  
箬嶺險登陟一朝盡坦平北堂臻上壽潔養歡顏生慈竹戀春暉遂

羈萬里程林泉足娛老鍾鼎謝纏縈竭來賢太守尊禮若五更幽光  
厲頽俗子子雲中旌吾聞黃山頂蓮峯曜金瓔天都闕靈異挺此間  
世英律以漢庭士彷彿桓公榮清風既已高潛德久逾明至今歙州  
路嘖嘖善人聲

題鮑璞齋先生傳後

周廷燮 贊宸

士生三代後懿行良難全薄俗尚夸詐文貌相周旋休哉鮑君子卓  
爲伊水賢讀書務實學寧獨攻丹鉛飭躬屏浮靡朗然由性天更有  
超世識植義不殖錢救災卹民患廣庇用復捐輿情便行旅祠宇開  
其前義學由以設子弟造就焉道路與橋梁利濟時拳拳分金溯往  
轍高誼差比肩撫孤待成立人祀賴以延排難與解紛勇往無留連  
卽君所行義死生愚智關其餘諸善舉一一重簡編飛鳥歸茂林潛  
魚躍深淵此心天地寬物我均無偏聲聞震邦國太守羅賓筵春卿  
頌幽德名公贈瑤篇二復君家傳至性何纏絲娛壽百齡猶自增

悲愆以此風近習古道庶獲還

奉題璞齋先生傳後

李治運 寧人

民風漸澆薄挽之惟信義信義根性生豈容雜私智卓哉行益高亶  
矣性彌摯一涉鄙與貪專事貨兼利表率非徒然實係風化始璞齋  
崇本務動作極純粹好義以爲常不顧身家累親舊通有無遷流因  
時地指困疇能攀贈麥詎足異旣欽枯樹生更感瑞鳥至揚米忍便  
餐蜀魚昔頻寄母壽百歲餘君年七旬外素行乃如此何必三公位  
崔烈不足數魯連亦胡媿予昔秉臬時知君天廟器郡守魏一山一  
一記公事風化實所關豈維式羣裔端足上 紫宸傳之鉅公賴實  
禮生旣膺祀典死宜備頽風一以振未末補政治

紀鮑璞齋仁孝寔行

莊培因 本淳

黃道補不足月令載贍貧利物務施博仁惠符蒼旻所以葉陽子助  
王息其民歛邑有名德鮑君斯儕倫英年入南楚侍父湘之濱地多

回祿厄延燒渺無垠融風扇炎雪萬姓皆嗟呻君復廣庇會全活焦  
頭入有如柏梁燼營建以一新弗惜不貲費裨竈壁勿陳典賢倡義  
學造士法成均於中給膏火講席延薦紳裁成譽髦士往往貢

楓宸敦詩暨說禮樂育同陶甄青青子衿佩一迈古朴淳迄今新安  
側雅與鄒魯鄰黃山有箬嶺山徑多嶙峋行旅憚危險來往咸逡巡  
君乃測然念何以慰迢迢開山取砥石蕩蕩形遄臻陸路旣平坦復  
慮彼涯濬臨流歎莫渡浩渺波潏潏巨川乏舟楫待渡需時辰鳩工  
事興築虹影橫春津登雲接空表雁塔凌雲蹲萬年利行涉盤亘水  
石磷川原悠繆境行者忘艱辛口碑頌盛德祝禱詠趾麟他如脫驂  
贈袍綈哀沉淪風塵覲僑札縞紵相先頻藉公舉火輩炊煙及茲晨  
歡顏生寒素黍谷回陽春釋紛兼利俗慷慨類指困友以六尺託孤  
業益復振當年藐諸弱家室成蒸蒸肝胆如雪白樂善乃其真人或  
勸之仕期以王蓋臣君方慕養志戀此高堂親不屑以貲入貽誚崔

氏鈞安意庭幃樂愛日忘朱輪依依奉鶴髮蒼翠瞻松筠何煩捧檄  
喜潔瀨供膳珍於時魏賢守欽茲孝且仁舉以礪風化禮致鄉正賓  
引年重羞耆爵酌躬自伸吳興大宗伯謂此德比瑾誠爲稀世賞嗟  
美辭諄諄褒榮若華袞製字勒貞珉緣知汗青史千載昭難泯行義  
有如是斯爲不朽身

奉題璞齋鮑先生傳後

何發子懷

東京流澤長曠代多英傑先生出其間高踪追往哲空名黜其華至  
行敦乎實富貴等浮雲夷然意不屑好善樂捐輸勝舉難殫述惟視  
義所存不惜千金鎰大哉利物心畢生如一日更羨逾古稀北堂猶  
康吉寸草戀春暉依依長在膝郡守切求賢雅懷深折節隆禮致賓  
筵耆德罕儔匹遠近播風聲奕禩垂芳潔

棠樾鮑氏三族宗譜卷之一百九十二

詩

七言古

題耕讀堂

張子經

我家藏書數千卷頭白讀之猶未徧况無負郭二頃田夜半飯牛歌  
粲禪西鄰老翁家更貧鋤頭犁耜隨秋春常恨半行不曾讀欲記姓  
名須倩人二者天公不輕予自昔幾人兼得取有書可讀又躬耕谷  
口南陽才比數鮑君風神秀紫髯多田也復多牙籤高堂榜之以耕  
讀寤寐千載師陶潛陶公心事羲皇上歸來但喜桑麻長周王傳與  
山海經懷此良辰伴孤往黃山崔嵬有佳氣鮑君長保山林味莫學  
掛書牛角帶經鋤祗爲一朝資富貴

題芳塢

趙淑

結茆山谷四無鄰隱居讀書清絕塵雲中半出樓閣影林下忽見漁

樵人丹崖松樹過千尺玉洞桃花經幾春我欲從之拾瑤草共攀巖  
翠望鸞輪

啼鳥行

被薦就道賦此

鮑 頌

尚綱

慈孝堂前有喬木慈烏歲歲來棲宿樹老經霜三百秋十畝涼陰覆  
苔綠慈烏啞啞相喚呼晨昏飲啄能自娛苦辛哺雛生羽翼雛今有  
子子又雛狂風疾雨幾來過欲覆危巢巢半墮虞人肆毒張網羅屈  
志樊籠嗟類我雛今雛今日千里烏兮繞樹啼不已誰云竟棄返哺  
恩未信人謀勝天理君不見高堂白髮遊子衣寸草莫報三春暉

代賦拜月詞

鮑 頌

空堦夜無人中天流素月照我羅帷房妾心轉摧折舉頭見月今夜  
缺月缺十二圓妾身經年久離別寒衣灑淚步月光夫君守邊妾空  
房燒香拜月月光好照我容顏鏡中老莫拜月嫦娥爲我愁斷絕寸  
心不逐陽臺雲孤眠暗縮同心結

元宵有感

鮑 頌

萬里秦川羣動息仙掌峯高露華濕關西奇士舊無雙廣寒傳得神  
仙術危竿百尺摩青空須臾火候遙相通初從平地發光彩銀花火  
樹爭相紅旋看星斗高相映點點流螢棲不定又如殘月向西沉欲  
落未落光生暈輕雷殷殷散清煙孤星如電冲飛鳶道旁觀者盡歎  
息此豈幻化非偶然君不見爛銀盤從東海出光盪乾坤水天碧煙  
銷火滅夜未央世間真偽君應識歸來屋壁燈正明瓦盆有酒同君  
傾瓦盆有酒同君傾

高郵湖阻風

鮑 頌

海風吹波湖水立巨浪奔騰怒蛟泣官船夜半落湖心篷底何曾安  
枕席舟師告語風波惡移舟急向前汀泊霜瓏寒月鴻雁哀風動兼  
葭轉蕭索因思王事自有程俄頃月落東方明起搖雙櫓復西去他  
年寄此高郵行

順風歌

昨日遇順風揚帆急於箭今日風打頭下流還纜繹舟人貴適意風力倏已變世間萬事母強為逆順從渠君勿怨

鮑頌

夜泊采石懷李白

鮑宅相

必成

嘗聞李太白采石江頭弄明月月明曾為照金樽留得芳名至今說文章冠世千古傳采石江頭月正懸持盃浪飲歌遺編神交千載心凜然謾說騎鯨飛上天

銅雀硯

鮑祖相

必輝

吾聞銅雀臺始自魏武室今觀硯上文展卷尋遺跡當年魏武何鷹揚手挾天子窺龍床摧袁馘呂逞功烈賦詩橫槊誇文章船連赤壁遭窮促烈焰燒空人鬼哭歸來不解慰民心却築宮臺營土木魏家宮女如雲多登臺妙舞還清歌可憐恣樂重顏色不知民肉填漳波一朝臺壞人已死銅雀流傳尚干祀良工製硯自何時流落山林伴

寒士屢茲求道日有光摩挲此硯非尋常滄波洗淨千載垢琉璃瑩徹開文祥何時為染春秋筆賴爾相資勤著述前朝成敗請勿論功在斯文曠如日

慶文芳公六十壽

鮑寧

庭謚謚齋

秋欲平分涼意多銀河如練澄無波蓬萊三山在何處瓊樓玉宇高差我樓中美人尚文雅自昔鄉評稱長者平生事業良已多晚景風神更清灑木公金母輝相聯堦庭蘭玉尤清妍人間花甲春不老壽鄉歡動開華筵故人千里居風憲此日思公難覲面五雲飛墮賀章來萬丈文光爛如電士林感此咸賦詩長篇短韻多瓌奇書之錦軸光陸離贊公世澤深無涯家成子美富而壽千百人中能幾有祝公更歷八千秋直與莊椿同未久

題存愛堂

鮑寧

吾宗有佳士皎然玉為姿溫良出天性勤敏工書詩少年為子知孝

道幹盡有方名譽早時時具膳問起居只願雙親顏色好事親有堂  
復有樓四時景物風光稠堂前椿樹枝幹古堂後萱花香氣浮歲時  
何以爲親壽白鯉堆盤薦春酒菽水娛親親亦歡愛日有心長不朽  
子今年壯行孔脩雙親猶喜未白頭一朝庭下奉親命買舟却向江  
湖遊江湖風月多清賞只爲雙親常在想詩句吟成淚暗揮眼望孤  
雲心獨往寒來暑逝歲事闌忽看行李返家山盡將履歷向親道子  
也無違親爲歡精神觀此深爲慨居堂扁之以存愛子心無盡親壽  
高北海南山可期待

鮑孝子時明吮疽詩

王珣

寒鴉喑喑聲中苦飛上疎桐哺其母堂前啼腸兒欲摧堂上負疽親  
已愈不知喑喑情中禽恩愛何如堂上心

吮疽詩

族孫楠良用  
龍山

母疽病足兒捫舌疽可吮足不可斃當時倉卒豈良謀寸舌通神足

已瘳百年母子堂中樂春韭秋菘引清酌病可吮吮有時爲君爲卒  
咸非宜嗚呼誠孝天所與敝箒缺鉏安足語

寄鮑字

李夢陽

愧我夷門草堂寂種菊蕪穢生蓬蒿爾家華堂近江滸開花爛熳秋  
雲高去年此日同爲客今年對菊遙相憶黃山練水在何處獨倚南  
牕望南國

題鄭公釣臺和篁墩程先生韻

鮑楠

富登之山多奇石富登之水深百尺釣臺突出山水間中有師山舊  
遊蹟師山講道一載居師山鳶飛魚躍常開顏忽然得此真絕境風

月一竿時往還臺前古篆伊誰士乃是忠宣手書字殘蛟斷虺不知  
年雷雨時時驚怪事二公不獨能捐生青陽餘力還弟兄平生所學  
真不負一游一跡皆可名臺花歲歲從開落雲水茫茫亂溪壑舊記  
惟聞石上鑿新題今見如珠絡篁墩之題傑以孤忠賢磻磻歸圖摹

臺名從此傳天下直與乾坤齊有無余有青陽文集鄭有余力藁

題畫作

鮑楠

茹齋半食蒼巖腹老樹如蛟矚寒綠出門買得東吳船載酒歸來江上眠剗却橫洲一千尺長將醉眼傲江天

送鮑漱還歛

李夢陽

昔時賢達或未遇途路坎坷常固窮鹽車騏驥亦拋棄人生豈得無西東君年五十猶未通江湖去住隨飛鴻黃山紫陽日索寘題詩蚤向軒轅宮

題鮑孝子異葩圖

譚性教

鮑子之孝世所絕號泣空堂聲不輒淚珠迸漉奇葩茁玉盤擎出根聯綴香味勝蘭色勝雪似蓮非蓮澤且潔叠開應祝合符節觀者填門爭詫說剗股療親三瀝血癩痕錯繡如花纈此葩無乃精誠結三槐可稿三花可折孝子之名不可滅

鮑氏櫬花三茁遠近異之咸以為孝感偶過許信孺別業因

出圖索詩賦此以贈

葉紘

近嗟世事頻翻復滿眼英雄墓草宿有蔡蔡當是蔡之誤何處向陽傾有樹誰言溫室綠挈友來尋高士遊忽出新圖動心目披圖云是孝子翁剗股三瘳今就木木上離離花太奇芳心素瓣間疎枝當與白華同皎潔豈從凡卉鬪芳菲弔者如雲觀若堵千秋寧識孝心苦他時移向北却山連理豐碑蔭黃土

題鮑璞齋先生傳後

范璨松巖

我生未識鮑君面僉言共信鮑君賢春卿沈公良史筆鴻文傳信何疑焉羨君風塵志高尚仰視古人不相讓節義須教維世風立身何必為卿相遙論崔鈞器識高襟懷倜儻人中豪誼篤分金無所惜笑視羹鼎輕鴻毛平生踪跡半漢水甘旨情深歸故里力行孝友示兒孫不問家人治生理生為清廉太守知歿為鄉國士庶悲恤灾惠澤

居者頌箬嶺平蕩行人思吁嗟末俗爭趨利古人所貴今人棄君將  
義利獨分明應有幽光輝百世我愛先生似魯連獨行高誼薄雲天  
只今悵望神何在六六峯頭揖列仙

題鮑璞齋先生傳後

沈慰祖

學周

黃山雲峯秀芙蓉新安江水清若虛鮑君家世名天都誕育自與常  
人殊幼而穎悟耽詩書動容有度親懽娛臨深履薄心凜如愛惜身  
體兼髮膚聞君行年二十餘樹立不獨饒田廬浩然臨風發長吁吾  
輩生世徒區區急人危難扶人孤俯仰庶不愧丈夫不見漢廷崔司  
徒輸金得爵何爲乎遂從南楚歌歸與襟抱慷慨情蕭疎登雲雁塔  
行可虞箬嶺道仄愁崎嶇公皆脩治成坦途豈顧囊橐空與無晚探  
墳素見古初優游泉石終閑居母年期頤貌清癯拔輿戲樂行相扶  
芳園春深榆柳舒碧流涓涓花滿渠朝勤灌園暮鬻蔬昆弟班白敦  
友于郡公佳君表門閭賓筵爲禮陳酒醕如君壽宜松柏俱豈期母

在身先殂皇天報施諒不誣將以後祿昌其孥臨風酌君酒一壺于  
秋瞻望爲楷模

戊寅春三月望日得讀家宗伯手著璞齋傳文雜誦循環畢然神  
往東京獨行今再覲矣漫題長句以附不朽 礪齋沈慰祖

題璞齋鮑高士傳後

許集

時翔

黃山聳峯三十六洞壑交迴最幽邃秀絕人寰鍾毓奇聿挺鮑君仁  
孝粹讀書不釣世上名寢門色笑時相迎北堂壽考天倍錫爲眷孺  
慕酬精誠席豐舊有素侯號囊篋時開濟無告矢心利物無間時寧  
識金錢漸凋耗逮君身返白玉樓乘紫螭兮驟青虬居人號哭遍鄉  
市感人以德何深優迄今捐館十八載親故道及涕橫灑歛山以西  
漢水東自煽仁風俗頓改何時跨鶴返故鄉雲霞作帔芙蓉裳黃山  
洞壑最深處一與故舊酣瓊漿

題鮑璞齋先生傳後

繆敦仁

梅澗

君不見五侯七貴誇門第又不見二陸三張角才藝那知人生首重  
孝於親出門尤期能濟世平生恨未識鮑公讀公銘傳仰高踪巍巍  
盛德罕儔匹芳徽奕奕追前風羨君孝行出天才耆年孺慕同嬰孩  
春花秋月奉母壽浮名於我等蒿萊寧辭駟馬車洩洩侍攀輿豈類  
守錢賈斤斤事阿堵分金遺烈紹往古寸心不忍棄孤苦扶危濟傾  
包與同高懷利物遐邇溥煌煌鉅舉終莫數詎僅口碑嘖嘖驚愚魯  
挹公亮節爲公起舞新安本自稱名都况逢 盛世仁孝化吾徒人  
瑞崢嶸挺世運但願與廉舉孝之典羣相扶

棠樾鮑氏三族宗譜卷之一百九十二

詩

五言律

伍子胥廟

鮑壽孫

子壽  
雲松

百世子胥廟猶存寂寞中鞭屍生快怨抉眼死遺忠故國古今夢怒  
濤朝夕風登臨一長笑斜日海門紅

上塚

鮑壽孫

瞻省慈親墓春風二月時掃松空有淚懷橘永無期寂寂幽堂閉瀟  
瀟暮雨悲白頭兒老矣腸斷蓼莪詩

題鮑仲安南軒

程文

以文  
黟南

遠客冬歸日南軒晚眺時山依黃帝井地接紫陽祠古刹留唐畫遺  
阡失晉碑桑籃與金釧先澤少人知

二物鮑氏  
先世所藏

寄鮑伯原

鄭居貞

詩書遺世澤慈孝舊門閭古道何寥落斯人獨卷舒春耕煙障暝秋  
讀夜窓虛尚憶連牀夕清談樂有餘

題芳塢

劉承直

幽勝似仙家綠雲石磴斜陰崖留積雪晴樹亂明霞寺遠時聞磬溪  
深未沒楂抱琴來谷口多是識桃華

五月五日簡吳友雲

鮑頌

風雨盟津館端陽節又來浮生嗟老大疎髮苦相催南北家千里乾  
坤酒一盃天涯知己少懷抱為君開

過呂梁洪

鮑頌

舟行踰十日曉渡呂梁洪山勢猶連北河流盡向東波濤天設險疏  
鑿禹成功南北風塵靜車書四海同

壽母

鮑宅相

母道尊鄉里開筵慶誕辰持家添白髮守志自青春姓字登臺自歌

詩動搢紳 朝廷重風化丹詔下楓宸

贈鮑孝子吮疽詩

陳漢日

母疾時方劇兒心遂不寧有懷親吮血無藥解通靈一念昭穹昊殊  
功捷迅霆令名終不泯從此有餘馨

吮疽詩

侯直

湯藥親嘗處呻吟動百憂納污心獨苦吮血淚交流應是精神格終  
然疾病瘳高風誰與並嘗糞庖黔婁

孝徵詩

祝允明 希哲

心香上太空沕穆覲天容肸蠁誠如在神明孝可通祗應六立府棲  
絳寸丹宮歌詠無慚作觀民有采風

宗老會詩

鮑崇爵 世祿

濟濟白頭翁筵開四景同消閑隨日短安樂願年豐杖屨花亭外衣  
冠樾里中教人誇勝事擊節動清風

送鮑光雄南歸

李夢陽

世事風波遠悠悠素髮新乾坤萬里色江海獨歸人岸柳牽行舫汀花照暮春山中采芳杜好薦北堂親

南浦詩

康浩

南浦幽人宅逶迤望不窮閒亭圍夏木畫舫壓春深今古睥睨裏乾坤俛仰中未知雲臥處清興幾人同

癸丑初度

鮑楠

瀝瀝社公雨番番花信風今年生日到又與病魔逢空憶折梅夢先君乃生楠夢折梅花恥言橫草功親恩與君寵罔極一般同

寄鮑崇儒

李夢陽

去日猶零雪庭葵遽復花新詩誰和汝久客自成家水國乾侵夏田風莽帶沙長淮日易暮珍重早棲雅

賀龍台公致政兼賀新居

鮑獻旌公宜郁林

知止由來貴君歸疏不停鼎彝崇寶慶冠佩極銀青未改陶公徑更新謝氏庭機關多勘破樂矣在煙汀

題望雲圖

彭定求訪濂

白雲緲何許悵望卧蒿人霜露飄零日梧捲隱恫辰烏啼深樹急鶴夢遠峯頻余亦王修似披圖倍愴神黃巾騰跋日白髮陷圍年共道誠能感誰知命不延行齊中壘傳名邁蔚宗編環珮珊珊在何曾隔九泉

題望雲圖

王式丹

積歲纏深慟思親述舊聞小時衣上線望處嶺頭雲簪珥猶殘篋松楸已古墳隴岡余有淚為爾落紛紛

題愛日山房圖

吳邦治允康鶴關

繪結一山房吾廬愛日長披書清晝裏開戶白雲鄉春染溪山色晴烝草木香此中皆孝旨椿樹茂高岡

題愛日山房圖

吳曜 篁邨

陽谷朝暎起東楹曙色新須知愛日客卽是望雲人大樹坐長晝高山哦好春小橋深綠路我欲陟嶙峋

棠樾鮑氏三族宗譜卷之一百九十二

一詩

七言律

訪方虛谷 二首

鮑壽孫

紫陽大老雪鬚眉道學淵源筆墨奇七袞已踰朱子壽萬篇不減放翁詩專城昨夢官三品故國春風酒一卮從此退休應有集留將事業付佳兒

又

眼空四海一虛舟人品猶龍謝輩流學比文公排陸氏名如坡老震幽州已拋印綬歸吟屋又向湖山擅酒樓天相斯文公老壽人間且住八千秋

渡江

鮑壽孫

誰憑天塹限南州煙草淒迷古渡頭故國已隨春夢斷長江空帶夕

陽流燒沈鐵鎖降幡出歌盡庭花辱并愁獨倚危檣弔興廢晚風吹  
客思悠悠

雨花臺

鮑壽孫

雨華臺上一登臨華散臺空萬里晴江潯三山天外落蔣陵孤塔日  
邊明煙雲彷彿淮南樹樓觀參差建業城拂讀殘碑弔耆舊春風無  
奈客愁生

平山堂

鮑壽孫

舊堂蕪沒草連空太息今亡六乙翁壁上龍蛇非昔日山頭楊柳自  
春風晴嵐北固嶙峋碧夕照蕪城慘淡紅獨倚叢祠舒望眼海門數  
點有無中

自贊壽星

鮑周景文  
蕪林

一片丹心可契天男庠歸去意陶然蕪林吟詠詩如海繭室貽謀福  
有田八表推年身屋潤兩庭交慶子孫賢養真更築迎仙館南極星

翁許伴筵

孟府尹遊黃山回次韻

鮑周

六六峯前刺史車蒼苔踏破石崎嶇杖藜欲與麋分逕攬轡寧從馬  
問途赤子山林窺使節白雲巖洞見仙都不將盃水煩民意自掬清  
溪當晚沽

次韻寄鮑仲安

汪獻仲魯

千尋練水綠差差百里溪山曉霽時縱使夢中能晤語那堪別後苦  
相思香風冉冉生梅萼春意青青上柳枝遙想棠陰清晝永無邊光  
景總堪詩

泰寧解任將行謾成

鮑同仁國良  
靜軒

每欲休官歸去難如今解印得身閑青雲有分且宜退綠髮無多今  
已斑練帶溪山追舊賞杉陽疑風月尚相扳明朝度嶺休嫌熱便買  
扁舟載月還

郡中舉伯原權師山教席

趙淑

山北山南桷與椽幾年辛苦為栽培談經喜見師儒席會計尤稱雋  
永才衣鉢有傳源有自詩書無墜淑將來便須作養成梁棟結構明  
堂要鉅材

送尚綱官陝西卷

詹同 同文

恩書新下九重天彩筆誰能述此編嘆我玉堂生別恨喜君綠髮正  
青年壩橋風暖千株柳華嶽雲生十丈蓮遙想西安多暇日新詩還  
寄鳳臺邊

洪武改元正月四日 皇上即位南郊禮畢還宮羣臣上壽

臣頰親逢盛典敬賦此以紀萬一

鮑頰

法駕南郊曙氣清從官車騎擁霓旌異香載道隨雕輦瑞雪凝華炫  
玉京四海車書尊正統九天風露靜無聲臣鄰願祝南山壽玉帛交  
馳日月明

龍虎山河回王氣天人翊戴遇明時彤庭曉簇黃麾仗紫陌晴熏白  
澤旂千羽兩階虞典禮冠裳百辟漢威儀餘生願際承平日想見皇  
風遍九夷

王侍御聽松軒

鮑頰

王子幽居俯近郊空中清響助吟豪五更風雨驚殘月萬壑蛟龍撼  
怒濤細斫茯苓供藥裹早收花露釀春醪 徵書已應丁公夢來聽  
鈞天韻轉高

寄題聞人知州雪篷

鮑頰

聞君聲價震關東退食華軒玉作篷雅志欲尋鷗鷺伴清標迥與雪  
霜同推窗不假帆檣力擊楫深懷利涉功我亦一篷臨渭北何時乘  
興笑相從

送省元爾朱敬伯赴殿試

鮑頰

棘闈香動桂花秋黃榜爭傳第一流鴈塔雲邊題健筆龍江湖上艤

行舟策書獨對二千字曉殿遙瞻十二旒尚想銀罍親賜酒宮花歸  
插鳳池頭

寄翰林曹監諸老

鮑 頌

鍾山萬仞倚天青垣掖風生覺地靈炬列金蓮同視草泉分玉兔聽  
談經長沙夜半居前席東井宵分聚五星萬里宦情應悵望暮雲春  
樹正冥冥

題春山雪霽圖

鮑 頌

大地春寒凍不開芙蓉仙掌玉崔嵬寒驢正好尋詩去舉棹何妨泛  
月來暖透陽坡霑落絮光搖初日炫層臺披圖重憶經行處彷彿江  
南樹樹梅

書師山先生所題黃山崖石後

鮑 頌

蒼崖百尺與雲齊徵士重來爲品題姓字一時通漢史文章千載並  
活溪春深莫遣莓苔沒日暖應添紫翠迷猶憶匡廬當日事短檠山

雨五更雞

題鮑氏貞節卷

陳彥回 訥齋

從夫遠宦喪夫歸扶柩攜孤泪滿衣堂上舅姑悲暮日眼中兒女仰  
春暉禮聞一醮終無改諾重千金死不違今見鮑家雙節婦前江後  
宋其光輝

又題鮑氏貞節卷

孫 隆 從古雪齋

二十從夫志不移夫亡守死最堪悲青燈照室雖無主黃卷傳家賴  
有兒地厚天高心似石男婚女嫁髮成絲平生節義誰能識日月昭  
昭太史知

送朱摠管南征

鮑 浚 伯尚餉春

奉 詔南征向海陬笑揮羽扇擁驂騑甲光照日金鱗動旗影翻風  
紫電流時雨回枯沾百粵嚴霜秉令肅三秋待看奏凱饒歌發功上  
麒麟未白頭

紅葉

鮑浚

白露凝霜秋已深染成紅葉滿千林殘霞照野秋無際古錦翻風力不禁宮女正懷流水恨行人偏感故園心一庭狼藉無人掃留得題

詩副晚吟

伯尚公為尚綱公仲父當入尚綱公詩前

景泰乙亥旅寓洛陽八月九日適

嚴君誕辰切自懷思不

得承歡膝下因賦詩一律以紀情衷云

鮑邦燦

時明

堂上雙親逢誕日天涯游子阻歸程庭闈應有歡聲洽各館翻多感慨生戲綵未儕兄弟樂開筵猶想友朋情癡兒欲致千秋祝寫就新詩聽雁聲

過張許祠

鮑祖相

胡馬南來捲朔風英雄為國立元功孤城無援身甘死逆賊難吞氣尚雄白骨恁隨原草碧丹心長對日輪紅書生欲弔前朝事短句吟成恨滿胸

當入時明公詩前

鮑孝子時明吮疽詩

蘇章

母病癰疽適暮年密將情事籲蒼天毒從吮處隨無恙疾轉安時豈偶然妙藥不資盧扁手芳名端並李英肩 聖朝正爾旌純孝行見歸於太史編

鮑孝子時明吮疽詩

曾瑤

客邸思謖夢斷時人來又索吮疽詩慈幃危急瘡難瘥孝子倉皇心愈悲一吮便能輸母困寸心便是有天知我家堂北知安否深愧還為薄宦羈

又

張縉

療母沉疴百計違兒心遑迫欲何為矢誠默禱神明契至行潛回造化機吮毒正當危急際承歡終見保全時風騷雖遠民彝在誰續南咳孝子詩

宗老會詩

鮑崇儒

世重

吾宗四世十四叟每時一花要一樽桃筇葛巾日共步青山碧溪常  
遶門竹林每輕南阮氏桃源豈是秦人村喜多述作擬陶謝逸亭千  
古風流存

又

鮑崇相 世輔

皓首龐眉十四翁年登耄耋樂何窮看花縱飲賢人酒敦俗還餘長  
者風物我悠悠塵世外情懷落落笑談中竹林棠棣無拘礙瀟灑何  
妨百歲同

又

鮑若松 懋承

清逸亭中宗老會深衣大帶古人同笑談不語市城事觴味惟歌歲  
月豐飲罷採花簪白髮醉歸扶杖倚東風竹林華萼遺芳躅重繼高  
風十四翁

又

鮑紹澄 良鑑

一翁爲主十二賓四代宗枝七十春不放光陰成過客共招風月作

閑人隨時只待花盈眼盡日何辭酒入唇勝會古來曾未有揄揚况  
遇筆千鈞

又

鮑可學 行之

一宗四世集耆英清逸亭中迭主賓各整衣冠遵古制隨宜餽饌逐  
時新屠蘇酒祝千年壽伐木歌頻滿座春醉裏笑簪花壓鬢清風明  
月未爲鄰

又

鮑天敘 惟惇

古來勝會豈無人誰似先耆篤至親四世有倫同皓首一時嘉慶共  
烏巾簪花攜笑年年景帶酒酣歌日日春謾道故園成底事清風猶  
自振頽塵

辛亥例該予誥癸丑病中始得其軸

鮑楠

錦軸遙頒從 日下黃雲深護到山中 恩光燧奕封還贈里巷趨  
迎鼓復鍾鳳泊鸞回銀海眩金聲玉振絳宮融平生奉國慙心計此

日拖紳愧未恭

主山

鮑德望 鎮之

秀拔靈山多勝槩主山棠樾獨成奇飛峯北峙排青嶂練水南還遠  
碧池喬木陰濃懷宋世羣花艷麗見明時登臨不盡追思意卜宅當  
年祖有為

清涼臺懷古

鮑士端 次卿

雲樹蒼蒼拂古臺行宮別館沒蒿萊惟餘釋氏傳燈在無復君王避  
暑來歲月暗更興廢事山川那管古今哀淒涼不獨陳朝感六代豪  
華盡劫灰

送許惠孺中翰北上

鮑士章 叔卿

年少翩翩上玉京秋風颭颭引行旌吳山易水縈離緒翰苑蘭臺署  
令名身近紫微龍杖肅毫揮丹禁鳳池清君家世掌絲綸盛佇渥恩  
波雨露榮

題望雲圖

徐陶璋 達夫

一自慈幃仙化後人間天上路湯湯六齡失恃悲何極廿載思親淚  
欲乾風雨未離黃海畔朝昏空望白雲端有生難禁臯魚痛我亦披  
圖不忍看

里言恭頌璞齋先生

繆遵義 方彥

耆碩叅軍垂懿範清廉太守肅賓筵萬間廣厦千人宅一寸良苗奕  
葉田燕國琬琰藏鳳穴謝庭蘭桂荷薪傳從知潛德高雲漢青史流  
芳示億年

補遺

平山

鮑壽孫

平岡橫亘北城頭一上青冥目數州吳岫南從京口出蜀江東赴海  
門流香銷后土花如夢煙鎖雷塘草亦愁惟有依然淮泗水年年吹  
浪到瓜洲

松聲

鮑壽孫

千丈森森磔柯生風來巖壑韻琮琤耳根一洗俗塵淨木末時聞天籟鳴  
涇涇銀濤朝拍岸蕭蕭鐵馬夜還營山中宰相殷勤聽說與傍人笑絕纓

方虛谷日子壽學有淵源詩亦枯淡勁瘦

棠樾鮑氏三族宗譜卷之一百九十二

詩

五言絕句

蜀源卽景

崙麓山

程襄龍 駢履

村之西山也嶠而崑雙鬟竝起嘗躋其顛一望數十里  
遠空疊嶂如羅城焉

岩巖俛村舍一僻兩峯開絕頂容搔首招呼太白來

金帶谿

清淺一灣自北而東依山滄流遠出邨墅擬名金帶谿謂  
其發源靈金也

寫影落青峯沿沙閒白鷺恐引捕魚人不種桃花樹

採菟澗

元時鮑琪妻吳氏殉節所也吳事姑孝謹至正十六年官軍克復郡城琪偕父老詣轅門遊卒下鄉哨掠居人各遠遁吳以姑病不忍去姑忽思羹吳懷兒出採菟遊卒俄至欲汚之吳大罵卒怒殺之蹴其屍入澗中兒竝死事載郡

邑志

採菟復採菟思羹姑在牀一時全節處澗草至今香

崙麓泉

大僅一圍深可二尺許渟泓激激夏冽而冬溫在崙麓山之下右村有數泉率不及此

暗竇窟無聲涵泓甘以冽好攜折腳鐺來試小團月

僊人石

相傳爲聶真人跨鶴飛昇處石上履痕宛然

仙人渺何許石上遺履蹟或在此山中相逢不相識

復春橋

入邨逕有石橋橫小谿上苔蘚斑駁不事雕績過此知居人之樸渾也

柳色年年綠小橋春復春山居無限好不解送行人

曇花嶺

入村大水口也下爲青蓮菴其上有亭名環翠葢新建云石磴曲盤盤優曇香細細徙倚最高空始識花中味

龍窟

在崙麓山後環巖之下一泓窅然昔有龍蟠伏其中後裂其石飛去爪甲痕蹟至今隱隱在石上

藏身未動時寧識此中處忽看一片雲去作人間雨

贈鮑季芳 十首選三

伍 超 曠雲

其一

陋巷柴門寂空齋客話驚人離風度合心跡共雙清

其七

衣冠頗近古笑語不諧今何羨輕肥子難忘金石心

其九

殘菊自能傲老梅強不移同心而地遠晚節幸相持

六言絕句

舟中

鮑楠

野渡溶溶春水夕陽點點寒鴉欵乃數聲何處行人一棹天涯

棠樾鮑氏三族宗譜卷之一百九十二

詩

七言絕句

維揚懷古

鮑壽孫

江北江南水一涯迷樓結綺兩堪悲雷塘草綠人安在曾見黃奴坐

井時

蔣山八功德水

鮑壽孫

功德河沙七寶池可如甘露降三危鍾山一滴曹溪水好及蕭郎索

蜜時

蛾眉山

又名天門山

鮑壽孫

黛色橫分兩岸頭中央冷浸一江秋眼波水碧眉山翠畫出人間今

古愁

秦淮

鮑壽孫

千年興廢運推移底用東巡厭勝爲劉季自從豐沛起鑿淮堪笑祖  
龍痴

大內流杯亭

鮑壽孫

曲曲漣漪蹙浪花眼中風景夕陽斜君王舊日流觴處時有吳兒來  
賣茶

烏衣巷

鮑壽孫

六代豪華事已非千年猶自說烏衣如今此地無王謝歲歲春風燕  
子飛

發杭州

鮑壽孫

武林春盡且歸休問訊餘杭一葉舟故國三年今日別行人欲去又  
回頭

感興

鮑同仁

麗日暖風吹不斷繁花翠草錦連天六十老翁閑未得百年還有幾

多年

題芳塢四絕

鮑深

山迴路轉到柴門茅舍三家自一村地僻雲深無俗客落花啼鳥度  
晨昏

右芳塢

曉日曛曛出海波暘和已喜照前坡一川花木逢春早六月涼風灑  
薜蘿

右當陽坡

石磴無苔怪底平林深山迴愜幽情採芝幾度歸來晚長嘯高歌待  
月明

右樵磴

長松天矯上雲霄老竹參差萬綠搖昨夜秋聲起林薄山窗時復聽  
簫韶

右松竹林

黃山虎頭巖

鮑深

巨石砢砢類虎蹲野羊山犬半銷魂遊人不怕巖前路直踞於菟進  
一尊

祥符寺

鮑深

森然古木覆苔陰四顧蒼山一徑深六月長廊不知暑飛泉終日響  
潮音

洪武二年春清明後一日風和氣清有旨命詞臣扈駕

登鍾山

上御擁翠亭給筆札命卽景賦詩論思之暇從容賡歌乃遊

崇福寺錫宴而還翰林臣朱升張以寧秦裕伯鮑頌起

居臣單友中李鐵冠道人張中俱得應制臣頌詩云

青松深護寶珠峯御輦來巡駐玉驄更歷華亭千仞表眼中春色萬  
方同

山上蒼松萬箇青山前鳳閣九重城君王莫倦登臨樂猿鶴林

間晝不驚

題詹待制滄浪漁釣圖

鮑頌

江水江花無盡藏一篷明月海天涼先生茆屋滄浪上寫作新圖掛

玉堂

贈鮑激兄弟

李夢陽

水學青龍左右盤玉流雙瀉碧光寒蘭昆並占空山月分掣虹霓作  
釣竿

宗老會詩

鮑翰

雍容禮度古人風四世衣冠鶴髮翁幸際太平無個事看花倚杖醉  
耶筒

北上

鮑冕

風恬水面舟初穩雲歛山頭雨意收欸乃快乘桃浪暖載將春色上

皇州

題鮑母賢孝錄

鄒士璉

萬山煙燧遍紅巾露刃鋒摧兩婦人乞得姑來身亦保不須谷口已

逃秦

鮑孝子親櫬在堂三現異葩

許立禮 季履

櫬上無根花日新一回瞻拜一思親豈知親鑿三判孝故現奇葩三告人

題望雲圖 四首

宋大業

痛深風木夕陽斜孝子心傷誅白華陟屺望時愁不見亂雲如海思無涯

白雲渺渺恨茫茫六歲伶丁便失娘今日成人誰顧我昊天遼濶那牽裳

弱質閨中勇絕倫以身迎刃障姑身獨持大義由賢孝死後芳名竹箭筠

山岡重叠月沉西上有遺孤掩袂啼多少世人誰望得望雲圖就白雲低

題望雲圖

王樹 虛舟

叅軍作賦本才多陟屺傷心廢蓼我無限臯魚枯血浪朝朝滴向白雲阿

棠樾四景

復古虹橋

朱儀 士表

綵虹橫卧瞰清波四畔山川景物多旅客往來心為喜底須鄭輅濟溱河

令尹清泉

泉因令尹著高名鄰里都傳氣味清月轉銀牀梧影淡小牕頻聽轆轤聲

橫塘月霽

晚來疎雨過前岡雲歛風生薦嫩涼恠底微波金滉漾一輪明月映橫塘

龍山雪晴

六花一夜著林巒晨起披衣啓戶看最愛龍山照初日瑤光徹頂傲

高寒

四景詩舊譜所載也按朱公士表撰定齋公行狀攷定齋乃瑛公別字見本宗崇學能詩此詩當入李空同贈鮑激兄弟詩前

樂府

樂府一篇奉題大宗伯沈師撰鮑璞齋先生傳後

陸

燿

青來

新安之水一何清駛漸江潏潏茲焉經始紆迴錯互行乎二百里一

解

天都之山一何嶄然拔地九千丈煙雲相連俯眎三十六峯兒孫

趨走後先

二解

水涵其秀山挺其珍陰陽亭毒誕生仁人誕生仁人

聿有鮑君

三解

傾貲急難指困孱羸脩除犖确締構堂基人獲其所

鮑君之施

四解

我登華宴座客熙熙我憩石梁行旅謳思鮑君曰嘻

惟母氏之教是循是依

五解

寸草三春言誦南陔天奪鮑君母氏心

摧母弗心摧

熙朝哲匠勒辭瓊瑰

六解

水則可乾山則可剝鮑君

之名庶幾不刊

七解

棠樾鮑氏三族宗譜卷之一百九十三

文

祭山川風雲雷雨師城隍文

鮑頌

惟神靈鍾光礚礚淵長開闢陰陽鼓閏萬物神受命于天而主佑下  
 民者也曰雨曰暘神實司之所以我國家命有司春秋隆祀於神也  
 今是邦之人罹兵禍日久凶早已極天不降雨者兩月也抑某等牧  
 非其材歟致斯民之困憊如此某謹涓清且敬脩壇壝用潔牲幣首  
 罪而致禱焉雖然雨暘之數出於天神必隨而應之 命于上天俯  
 從衆望揚靈太虛使甘雨大降務祈滂沛以全民命是亦體之天仁  
 某等所當禱也豈神私耶惟神至靈謹告

此文當載第五

祈雨文

鮑象賢

嘉靖三十年辛亥歲五月戊子朔越七日甲午 欽差巡撫陝西等  
 處地方都察院右副都御史鮑 謹率都布按三司等官賈應春等

敢昭告于 風雲雷雨之神 山川社稷之神 城隍之神惟 天  
以雨澤養萬物而 百神實司其職惟 君以致教養萬民而百官  
實宣其化 象賢 欽承 上命撫循茲土自惟疎才涼德無以表率臣  
工 君惠未宣民隱未達皇皇在疚若履淵冰適者亢陽爲虐雨澤  
愆期百穀未榮萬民情急此皆 象賢 奉職無狀之所致也用敢禱於  
明神惟 神默運神功幹旋造化雲蒸雨施遍及九垓使 天心仁  
愛之意不遺下土而 明神之職於斯盡矣 象賢 亦得以免咎焉其  
敢志明神之休功謹告 當載 第六

祭雲松先生鮑公文

鄭玉

維至正三年八月甲午朔越二十七日庚申里後學鄭玉謹以特牲  
清酌之奠百拜致祭于故寶慶路儒學教授雲松先生鮑公嗚呼告  
曰惟先生之發軔值宋氏之危亡故遭舉雖足以小驗其所學而生  
民不得以被其汪洋俄盜起於閭里肆殺戮於玆環願殺身以贖父

卒俱免於害傷及我元而筮仕大闡教於鄉邦雖寶慶之邊徼亦弦  
誦之琅琅卒之仕不足以究其所蘊乃大發於篇章嗟予生之已晚  
不及覩乎前輩之耿光幸通家之有素聞言行之惟詳茲窳窳而視  
窳謹致奠於一觴尚饗 當載 第二

祭熙堂雲松二先生名登宋史文

鄭玉

維至正七年十有二月戊辰朔越十日丁丑里契家生鄭玉謹以少  
牢之奠致祭於萬三提幹元六路教二鮑先生惟二先生在至元初  
避難山谷遇賊道塗父子讓死卒全其軀慈孝之行著於鄉閭事聞  
朝廷太史顯書袞冕褒榮爲世範模嗟予小子好託通家秉彝懿德  
異世同符聞茲盛事鼓舞懽呼擊牲醢酒致奠庭除二公如在尚鑒  
其愚庶幾里俗可敦薄夫尚享 當載 第三

慈孝事登宋史告廟祝文

鮑元康

維至正七年歲次丁亥十二月八日嗣孫 元康 謹以少牢酒醴敢昭

告於 高曾祖考宋史成于至正五年十月已經進奏嘗被一覽七  
年鈔板於杭十二月族孫某得墨本以歸內第二十一卷孝義  
傳載曾大父府君與先大父府君爭相為死事既詳且明足垂勸戒  
元康 伏讀之餘誠歡誠喜且懼且惕伏惟吾家世久源深代以忠厚  
為心法禮節為身防讀書力農安分田墅迨宋德衰州無刺史縣無  
縣令民失所恃盜賊蜂起在在皆然于時曾大父與大父謀潛巖穴  
為逃生計乃辭舍西走行未遠為賊所得曳至槐塘命在頃刻當是  
之時唯知有父子不知有死生讓生代死發於至情出於懇測故賊  
亦憫然為之却刃天乃連威風震林木賊衆散逸父子獲全豈非天  
耶繼而賊恚恨復燬其鄉勢方炎焰俄復四滅門閭獨存若表其異  
蓋實天也吾家世處閭閻於今無顯宦祖宗雖有至行何由上達遭  
值聖朝德化休明平治日久遣使搜訪遺事鄭先生玉公正好揚嘉  
行遂得上之朝廷列之信史達之天下傳之後世然後益知天道之

可信也天下之人皆知所勸矣况我子孫乎

元康

為兒時嘗聞吾父

言方丙子擾攘曾大父一日夢大水泛吾鄉吾家門閭獨無恙比亂  
定還鄉果如其夢觀其兆而知後人之必昌也嗚呼吾父言猶在耳  
而音容不可覩矣向非吾父有治家之道有知人之明有郡志之徵  
今亦何以致祖宗之盛德如此其光顯耶惜乎吾父之不及見也罔  
極之恨何如 元康 為孫無狀有忝厥祖然得見祖宗盛德播傳不朽  
敢不齋沐揭虔以告嗚呼清田之家易於玷類溫飽之餘易於驕逸  
繼今已往為子孫者敢不兢兢自持惟慙惟懼尚望祖宗之靈克祐  
後人俾肖先德永永無墜謹告 當載  
第四

祭登仕叔父文

鮑壽孫

嗚呼吾父同產惟叔父一人叔父視壽孫猶子也叔父平生大節人  
所不能言者惟猶子能言之吾祖喪時吾父年二十四叔父年十七  
協力一心充拓先業兄弟嫂叔之間無間言未嘗分爾汝營已私也

今無叔父義居之風斬矣壽孫曩侍叔父兩試漕闈飲三元之危樓  
覽羣花之盛集同遊同賞何喜如之今無叔父湖山之遊絕矣壽孫  
姪也周卿姪孫也叔父語言之間每每鞭策其懶惰警戒其狃急言  
言藥石未嘗以疾言忿色相凌忽亦未嘗以甘言軟語相調笑也今  
無叔父仁人之言寡矣先年吾宗元二兄喪今年夏吾父又喪叔  
父哀摧痛苦悲不自勝往往浩嘆鄉黨之乏人未嘗有彼此之間也  
今無叔父慶弔之禮劣矣追想叔父平生起家辛勤持已以約其出  
言也當其處心也平其待宗姻甚和其御僕妾甚惠晚節末路大段  
超脫真可與花瓢老仙神遊八極之外而肯留戀人間世乎抑且叔  
父年踰六十不爲不壽田連阡陌不爲不富子喪而孫秀不爲無人  
切意尤有恨者不及見二孫之成立二度之落成獨此少欠耳嗚呼  
吾宗不競人物眇然前輩凋零後生失仰不半年間吾父叔父相繼  
淪謝壽孫寧不爲之大憾耶非獨壽孫然也凡在宗黨寧不爲之悲

惋耶此情此恨二父其知之否耶幽明死生一理也叔父有靈尚其

鑒之

此文當首載

右舊譜所載雲松公祭西疇公文稱祖喪時父年二十四叔父  
年十七以此攷之未平公係卒淳祐丙午事實所載生年卒年  
恐皆有誤無能覈實正訛謹識於此

棠樾鮑氏三族宗譜卷之一百九十四  
銘

慈孝堂銘 并序

宋 濂 景濂

歛之鮑氏故衣冠家也其諱宗巖者身載明德弗售於時人號為棠  
樾處士當至元丙子郡將李世達軍叛羣寇相挺而起肆其屠劉  
歛民相驚皆風雨散去處士君與其子寶慶教授壽孫共伏大壑中  
未幾寇嘯呼而至執處士君反接於樹抽刀將刺之教授出泣曰吾  
父耄矣不足以汚兵鋒願憐而勿殺即殺我請代之言畢引頸就刃  
處士君曰吾只生此一兒死我猶可吾兒死則宗祀絕矣慎勿聽之  
相為讓之良久寇欲舍之或牽制於衆欲兵之又弗忍計未知所定  
忽有風颯颯起林木間類鏃騎蹴踏聲寇相顧怖愕疑官軍將捕已  
丞相率東趨父子因得釋歛之人士咸歎曰孰謂無天道哉使無天  
道處士君父子何為乎而弗死也其慈孝之報乎當處士君之受縛

子但見其親而不識有身父但見其子而罔知有已死生禍福尚不暇慮初不知何名爲孝何名爲慈乎脫使處士君曰我必如是乃慈其子又曰我必如是方爲孝不幾參於人而不純其天乎嗚呼有若處士君父子足可爲世勸矣然子爲父死古之人多行之者固可爲勸也若父欲存其子而自殞其生其爲勸可乎曰非是之謂也處士君爲存宗祀也爲存宗祀則孝之大者也不然則其宗爲若敖氏之餒鬼矣用以爲勸何不可之有哉予與鄭內翰子美游子美歛人也其談處士君事甚悉予每爲之太息慨然遐思其爲人今處士君曾孫任詣予請曰任之祖父嘗以慈孝名堂鄉先達程公已爲造記先生能復銘之乎予因歷敘其事而繫以辭使任勒諸堂上子孫世守之以爲式鮑氏之世其益昌矣乎任端恪有學行蓋懿然君子人也銘曰

父子之道一體而分天性昭然萬古無昏氣血感通罔間毫髮伊

誰楛之戶庭胡越惟歛鮑氏世敦書詩子勉於孝父勉於慈宋鼎將移羣寇方熾不幸遭之反接於樹有子含淚長跼致辭刀劍在前目不見之無死我親死我則可親死子存千齡亦天父謂其子我耄及之日月所照寧復幾時冀子之生得存宗祀生生無窮孰謂吾死白刃可蹈難違者天若此父子何人弗賢寇雖匪仁天嘏是錫疾颺西來褫盜之魄立聖樹教重唯五倫五倫有行曷名爲人慶延於家繩繩孫子孝慈之報庶其在此有歸者堂揭以嘉名仰而瞻之如交神明爲上或頑爲下或悖來游來觀翻然自悔

亦政堂銘

并序

汪克寬

仲裕  
環谷

亦政堂者同郡鮑以仁所築以奉其親者也以仁孝奉父母友于兄弟理家有法益受學於先友待制鄭公而有得焉者公嘗摘東家聖師之語以名其堂而記之矣請言於予予曰傳不云乎政者正也上所以正不正而下所取正者也然書稱君陳克施有政謂其推孝友

之心而施於一國之政也吾夫子言施於有政是謂以孝友之心施於一家之政也故曰是亦爲政亦之爲言謂治家治國同是道耳蓋窮則爲一家之政達則爲國與天下之政子曾子傳大學於齊家治國平天下二章俱以孝弟言之有以也夫果能致盡已推己之心則在己者孝而人皆知爲孝在己者友弟而人皆知友弟放諸四海而準夫奚難哉旣以語以仁乃撮其義而銘之銘曰

政以正事綱紀經綸帥正以正思濟斯民絜矩之道篤近舉遠爲政以德脩身爲本天之生物立愛惟親由是而推施及兆民各親其親各長其長天下治平如運諸掌華助孝弟斯道之原立聖設教孝友彌敦自家刑國以建人極君陳之命斯爲準則鮑子克孝木培其根怡愉奉親睦于弟昆翼翼高堂爰居爰處聿顏其楣允念魯語篤於所厚表端影隨窮養達施舉而措之自治治人至於至善惟日孜孜令德顯顯入道有門積學有基孰謂華高跋其齊

而願言勉旃毋慙毋替永保嘉名貽諸來裔

存愛堂銘

陳賓

新安鮑時明扁其奉親之堂曰存愛會稽陳賓爲之銘曰

愛親之心本乎天性良知良能匪曰命令方其孩童思出虛正物我旣蒙理欲交競彝道日乖已私日勝遏欲制情訓由賢聖卓哉鮑氏克惇孝行左右奉承晨昏省定一念格天保茲具慶流俗薄偷孰克與並我重其人作銘以贈

紫石端硯銘

鮑壽孫

至元癸巳冬予備員鄉校越明年友人蔣君貺予一硯墨漬不滌硯池塵滿予心甚忽之一日郡侯恆齋侍其公來見謂予曰此端硯也亟以水滌之所謂猪肝色鵠鵠眼皆具焉予切怪蔣君貧甚家徒四壁立何從得此試叩之乃故丞相范公鍾守新安時蔣之從父爲其牋奏吏及事公政府公以此硯畀之如此則信乎其爲范公故物矣

嗟乎一硯之難知如此微侍其公一言子幾失之獻璞得別明珠暗投自古以來然矣豈惟一硯哉此子之所以重有感也蔣君名天賦今別去三載書此銘以遺之時大德三年己亥十月銘曰

五嶺之南瘴雨蠻煙端溪佳哉紫雲摩天其下爲石金聲玉質貯水如淵運墨如漆萬里南來際遇公台中道舍旃流落塵埃石眼閱人盲夫莫識知我者希珍哉斯石

此銘當首載

棠樾鮑氏三族宗譜卷之一百九十五

贊

梁將軍程忠壯公三贊

選一

鮑士寧

偉人之生庶民仰依物爲民害我則除之我矢不遺彼妖滅跡民莫厥居恩波罔極

射蜃

新安鮑君儀之孝徵贊

并序

楊一清

應寧

傳曰孝弟之至通於神明嘗質此以考諸古其動天地感鬼神彰著如劉殷孟宗華陽志之徵之類者皆以孝感不可誣也於今復得鮑孝子釗者焉孝子新安人也富擬埒封好善樂施父伯希君有疾萬方弗愈號籲禱天叩頭立帝疾倏愈既乃齋戒沐浴銘心走繭矢謁太嶽抵翠微忽見帝巍然如在其上驚竦避拜嗚呼神聖之事儒者所難於言而容或有可論者昔者生人之初蓋未始先有人也固有氣化而生者其聚其散皆神之所以然也是故立武者天一之精北

方之象也况其昭格我 國家輔祐 皇圖名山巨府鎮壓坤軸使  
天下之人星奔霧走畏敬承事而不敢射焉茲其所以爲盛矣乎而  
釗何以得於此耶亦曰孝者天之經也地之義也而民之行也一念  
之正遂至察乎其天保乎其親而又顯其靈異則其致此非倖也精  
誠之極感通之妙鬼神之機造化之發也顧可以厚誣也乎哉程君  
肇之不遠千里來乞文以風鄉人夫孝固可以風天下也已遂爲贊  
贊曰

赫赫上帝爲民錫福厥感克貞厥應維穀敬叔齊裔新安世居孝  
子令名與天爲徒粵若貳負帝乃楛之嗟嗟忠孝莫逃天地善旣  
曰彰惡必是肆我繫斯言併告萬世

光祿大夫柱國少傅兼太子太傅吏部尚書武英殿大學士知制誥  
經筵官致仕石淙楊一清撰

鮑璞齋先生贊

繆曰藻 文子

猗歟鮑父德潤才優心與仁浹路以義由歛北楚南惠波滉漾一舸  
載金孔懷馮盎豪情俠性殖財尚施紫漂黃榜愚守何爲聲播桑梓  
采風動色典禮賓筵鄉閭矜式煌煌萱茂颯颯莪摧夜臺孝子痛詠  
南陔

璞齋鮑先生贊

邵 泰 北崖

嘗讀范文正公記竇禹鈞事迹輒慨然歎曰嗚呼自古輕財好施積  
功累行之士間代多有未有若竇諫議之好行其德至老弗倦者此  
其所以爲君子歟靈椿一樹仙桂五枝豈足彰其報哉茲閱鮑璞齋  
先生傳我儀其人心焉數之范陽竇氏之風庶幾近焉傳載事迹甚  
備故弗贅爲之贊云

秉心純懿器範高雅激揚仁風道映天下厚施不倦翁真長者義  
以居鄉孝以事親匪騫於利匪隆於名淵淵令德玉色金聲好善  
一世厥功斯普如彼慶雲有目共覩黃山白嶽與之千古

棠樾鮑氏三族宗譜卷之一百九十六

跋

亦政堂跋

鮑深

右亦政堂記一通師山先生絕筆之文也初族弟觀與偕請於尊人君茂翁擇里之中村構屋一區踰年而落成內而廳堂庖廚外而廩庾賓舍靡不備具後倚平岡前俯川原高明曠達堂之東方池湛澈嘉木鬱茂水光日影蕩漾窻戶清風明月往來于階除堂外黃羅金紫石耳南山秀出雲表升其堂令人心目豁如也壬辰之變祖居既燬因奉翁居之嘗拜師山先生請名其堂題曰亦政復請其義先生語之曰生家父子兄弟三世孝友同心同財刑於家而化於鄉語曰惟孝友于兄弟施於有政是亦為政矣觀拜曰兄弟之不肖未必如先生言然敢不為先生勉及先生記之而堂與偕不存每思往來從容堂上悲喜交集不能去懷觀珍藏其文復書諸冊予因為述其堂

之制與名堂之意如此俾士友相與歌詠之何時重構斯堂奉翁燕樂其上則觀之責也予之望也是歲辛丑夏五月望日書

遺澤卷跋

陳賓

予尹歙既有年凡邑之文獻舊族則必求訪其流風遺迹用致景仰先哲之意焉棠樾鮑氏其一也鮑之先本青齊人自晉太康間遷於歙又四遷而居棠樾累葉相承後先繼美或顯仕而著烈勛或居隱以事高潔其孝慈忠義炳炳烈烈使百世之下聞而知之者猶不能不爲之歛衽起敬也其宗之先達有諱宅相者嘗哀集先代遺筆裝潢卷軸以寓不忘手澤之義鄉之先生長者文以記之矣今其子復又能保護益周遇大夫君子輒出以求題詠於以發揚其先祖之美嗚呼世之人於其父祖錙銖之所遺則保之唯恐其或失至於父祖德善之美詩書之澤則澆不之省視鮑氏之子孫其賢不肖何如哉予因而有以知鮑氏遺澤之綿延爲有在也故爲書之

跋孝徵錄後

鮑象賢

孝徵錄士大夫爲宗兄釗作予見而大懼夫孝人子之事錄秉彝之良夫何懼先予大父時明公以孝著名稱於鄉邦而舉於彭幸菴後卒壞於猶子而沮於公大巡家君二請京師卒大困則斯錄之果傳也宜懼或謂兄之子姓不同予門今之良有司非昔時比其然可免矣

嘉靖乙酉季冬望日宗弟象賢謹書

棠樾鮑氏三族宗譜卷之一百九十七

書後

書吳氏貞節卷後

太康孺人

鮑象賢

節婦與子居近其新寡時子猶童子也先恭人每攜子慰節婦見其抱幼子怨泣則泣然悲子亦知哀之矣其長姒悍不以禮遇而心安焉志在成其子也恕已成立得侍士大夫表章母德以就斯卷節婦亦可以自慰哉雖然貞節以成子母之志也表章以自顯則子情也顯母以盡情孝之文也立業以啓後則其實也恕果欲用其情也將亦務全其實哉庶幾斯卷之可傳不為彌文而已

書喪祭禮要後

鮑象賢

喪祭禮要圖為邑博王潛潭所編序為吾師東郭先生撰夫四禮備於古書今制而有不行者人之過也此圖亦何必作察其意乃為寧邑設寧之風文奉生而誕事死率以古禮類畏難而苟安就其所行

則又不經之甚禮要之定其爲教亦美矣圖示其式文導其行而儀節損古之半豈但寧邑易行之達之天下可也雖然圖之所可定者儀也而慎終追遠之意非圖所得盡也卽其禮而求其意是非作者之心遺其意而習其儀母乃爲傳者之糟粕與予於是乎有警

書鮑安人傳後

何焯吧瞻義門

昔陸黎民有言丈夫之德表於事行婦人之美非誄不顯此亦謂容德之備淑媛所同內言不出但當爲誄以致追美之意爾若夫貞烈非常之行則子政旣爲頌圖於前元凱復著記讚於後蔚宗因之後漢遂述列女歷代史家相承爲例懿乎其弗可易已新安鮑周士字西枚有賢母曰程安人當康熙甲寅三大藩叛亂其別將窺江西贛溫處遊兵至新安四出焚掠村聚爲墟安人之舅與夫皆客於浙省獨奉其姑走匿箐林中轉徙嶮艱一日遇賊露刃至欲戕其姑安人以身障之乞貸姑命刃著其首血淋漓被體賊亦哀而捨去此其事

與由來彤管所述意豈異也生周士始六歲安人病瘵自知不起撫周士泣曰吾任身時爲爾嘗法古胎教遺意及爾在襁褓知孩笑皆惟恐或納於邪今爾可以就外傳乃不及見爾之成耶爾念母者迨長勿忘吾教而已由其言益知安人平居一舉動必循自古賢女子之行其倉卒脫姑於厄者非匹婦之諒所能致也君子謂安人旣昭婦則且擅母儀宜狀其行上太史氏於是同年吳君漪堂以史法世其家者也特爲安人立傳吾知安人必他日附本朝國史以垂聲無窮矣康熙辛卯仲春長洲何焯書



舉進士授行人擢戶科給事中尋進刑科都給事中會延綏失事  
奉

命出閱按軍府部署方略覈首功虛實策防禦便宜議上咸當人心  
無枉撓在禁近七年出入唯謹陞叅政江西畢親喪補山東大盜  
施尚詔起歸德趨山東道明以部卒戍滕武備甚具賊遂却尋受  
禽以保禦功賜金論賞進浙江按察使持法摘奸關說不入進四  
川右布政轉雲南左使會計物力節不時徵發滇人使之已未進  
應天府尹旋轉右副都撫貴州馭夷有法盜賊屏息討容山酋斬  
首二百論功賜金幣已進大理卿尋轉戶部左侍郎晉南京戶部  
尚書乘兵變後主度支體國撫軍不遺餘力旋乞骸歸家食五載  
卒於隆慶戊辰

諭祭葬如令甲

右鮑司徒行略采之汪南明先生所作司徒志也談者言司徒處  
刑垣楊椒山西市之論實與聞焉以是爲司徒短斯言信乎予不  
知司徒生平但據南明先生志閱歷具備推忠愍死諫之年殊不  
相符忠愍癸丑抗疏乙卯冬死西市諸紀詳矣志云鮑公三年大  
行七年禁近則自戊戌閱乙卯且十七載爾時已出叅藩前之不  
相符者一也志云叅知江右後丁艱起補洊歷諸省己未春以滇  
左轄入覲進京兆則由出叅至京兆速化亦應有年若乙卯冬猶  
長刑垣則叅藩後計年至己未春自讀禮三載外實歷官止一年  
有奇其間江右東土浙蜀滇南命途日且不足何從驟躋京兆後  
之不相符者二也縱文人揚善然於服官年載假借上下司馬名  
筆定不出此適據傳聞叅所檢閱識以質之談者

皆

泰昌元年歲次庚申秋九月朔日

棠樾鮑氏三族宗譜卷之一百九十九

本宗業儒有文藁傳者

雲松公 壽孫 字子壽 寶慶教授

所作西溪詩集

景文公 周 欽庠教諭 封黟縣尹

所作有薌林集

國良公 同仁 會昌同知 元康 號燕齋

所作有出處小豪并註標幽賦

仲安公 深 山長 號雙柏

所作有燕齋集

伯原公 山長

所作有芳塢樵隱集 投鋤錄

伯尚公 浚 號雙柏

所作有雙柏集

尚綱公 頴 翰林脩撰 祖相 號雙楓

所作有升客豪 聽雨軒集

必輝公

所作有雙楓集

本宗崇學能詩者

二公 玠

永高公 衍

秀叔公 山

傅叔公 宗巖

澤叔公 慶雲

子善公 元孫

景曾公 禮

君璋公 羅

以仁公 觀

以重公 琛 任知事

南季公 任師

思齊公 汪如

以善公 積慶 蜀源

銘善公 良 蜀源

士寧公 康 蜀源

汝欽公 莊 號一懶

尚文公 宗吳

尚敬公 誠

文益公 助慶

必成公 宅相

必達公 榮相

時珍公 琇璘

定齋公 玳瑁 編集思本錄

右舊譜所載本宗先世業儒有文藁及崇學能詩者 純以  
既載事實小傳今不續

棠樾鮑氏三族宗譜卷之一百九十九

述文翰名士

翰林

歐陽元功 諱玄 元太史

撰宋史孝義傳

鄧善之 諱文原 元學士 憲使

撰鄉林集序

虞伯生 諱集 雍州人 元學士

撰文公復田記

楊志行 元學士

撰心田道院賦

程以文 諱文 號黔南 元應奉 御史

撰靜軒記 慈孝堂記 耕讀堂跋

鄭子美 諱玉 號師山 元待制

撰宗巖公傳 耕讀堂記

亦政堂記 國良公之官序 設醮詩序

燕耕讀堂詩序 祭宗巖公子壽公文

景曾公墓志 景文公墓志 仲安公墓表

朱允升 諱升 號楓林 明學士 撰國良公墓銘 慈孝堂記

亦政堂記 尚敬省兄序 墓誌 慈孝堂記  
諱同 婺源人家黃州 明學士 撰芳塢圖賦 仲安公墓表

詹同文 贈尚綱公之官陝西詩 尚綱公手書公文  
諱同 婺源人家黃州 明學士 撰慈孝堂銘 尚綱公手書

宋景濂 撰尚綱公重建耀州聽事碑文  
諱濂 金華人 明學士 撰慈孝堂記 撰尚綱公

王子充 詠芳塢詩  
諱禕 金華人 明待制 慈孝堂記 撰尚綱公

劉承直 詠芳塢詩  
章貢人 明博士 慈孝堂記 撰尚綱公

許存仁 詠芳塢詩  
明博士 慈孝堂記 撰尚綱公

涂穎 寄仲安公詩  
豫章人 明博士 慈孝堂記 撰尚綱公

汪仲魯 撰尚敬公墓碣銘  
婺源人 明左春坊 慈孝堂記 撰尚綱公

劉剛 撰尚綱公聽雨軒記  
金華人 明翰林學士 慈孝堂記 撰尚綱公

陳基 撰尚敬公哀詞  
臨海人 慈孝堂記 撰尚綱公

端木孝思 鮑母羅氏汪氏壽敘  
溧水人 慈孝堂記 撰尚綱公

方懋德 鮑母謝氏七十壽序  
諱勉 潛口人 明庶吉士 湖廣參議 慈孝堂記 撰尚綱公

鮑譜序 復古軒序  
雲間人 明庶吉士 慈孝堂記 撰尚綱公

陳文璧 撰遺澤卷文  
明翰林檢討 慈孝堂記 撰尚綱公

汪奉 撰鮑母謝氏七十壽序  
明翰林檢討 慈孝堂記 撰尚綱公

名宦

方萬里 撰西溪詩集序  
諱回 元建德路總管 慈孝堂記 撰尚綱公

洪潛夫 撰新安先達傳  
諱焱祖 號杏庭 元休寧縣尹 慈孝堂記 撰尚綱公

唐仲實 撰尚綱公之官序 聽雨集序  
諱桂芳 號白雲 教諭 慈孝堂記 撰尚綱公

貝遠翔 撰心田道院記  
沂州判 歛簿 慈孝堂記 撰尚綱公

許應旂 撰薌林集序  
鄱陽人 元徽州府學教授 慈孝堂記 撰尚綱公

吳德昭 撰薌林後序  
諱潛 號樗菴 明潞州同知 慈孝堂記 撰尚綱公

鄭彥昭 撰元康公祭文 詠山長公詩  
明禮部侍郎 諱同 慈孝堂記 撰尚綱公

朱大同 撰江節婦傳 題贈山長公詩  
明禮部侍郎 諱同 慈孝堂記 撰尚綱公

陳訥齋

諱彥同 莆田人 明徽州府知府

撰慈孝堂記

耕讀堂詩公稿

江氏貞節詩

宋氏貞節詩

寄山長公詩

崔彥俊

號愚山 新建人 明徽州府知府

題宋氏貞節詩

慈孝堂詩

孫從吉

諱隆 號雪齋 浙江瑞安人 明徽州府知府

題宋氏貞節詩

贈謚齋墨梅并詩

陳賓

會稽人 明歙縣知縣

跋遺澤卷後 復古軒記

江灝

天台人 元徽州府學教授

撰亦政堂記 餉春軒記

林謙

瓊州人 明徽州府學教授

送文益鄉貢序

程伯昌

諱蕃 明徽州府學教授

撰雙楓六十壽詩序

陶凱

天台人 明晉府右相

跋尚敬碣銘後

鄭士恆

諱久成 六安人 明秦府左相

撰出處小藁序 奉山長公書

唐子儀

諱文鳳 號梧岡 明趙府紀善

撰思本錄序 慈孝堂序

宋節婦傳

必成公行狀

大和社記

必輝公家慶圖序

曹從善

在城人

題宋氏貞節詩

賴天貴

麗水縣學諭

贈監稅奉使鮑公序

張孟兼

金華人 明國子學錄

撰耕讀堂記

鄭居貞

明布政

寄山長公詩

羅倫

豫章人 明徽州府學教授

撰鮑母江氏七旬 定齋六旬壽序

黃貴

清源人 明徽州府學訓導

跋貞節卷 遺澤卷

皮岳

吉水人 歙縣學教諭

撰鮑母汪氏八十壽詩序

李泰

東魯人 明刑部主事

撰鮑母汪氏八十壽詩序

楊貢

明監察御史

撰文芳公六十壽詩序

韓景賢

諱忠 大梁人 明鳳陽府學教授

撰思齊公墓銘 存愛堂記

鮑譜序

黃季倫

鄱陽人

賦亦政堂詩

陳憲

山東人

撰亦政堂贊

陳睿

會稽人

撰亦政堂說

解原

賦亦政堂詩

趙璉

上虞人  
明績邑教諭

賦復古軒詩

儒士

周彥明

諱原誠 號澹如  
又號石泉

撰國良公傳 國良公八十壽頌

國良公政績

逸老述懷序 金鍼賦 先德錄序

鮑孝婦貞烈吳氏傳 山長公六十詩序

茅三間記 釣石記 黑杖賦 大母場記

慈孝堂記 太古軒記 亦政堂記 江氏節婦傳

汪德輔

諱克寬 一字仲裕  
祁門人

撰慈孝堂記 亦政堂記

趙子常

諱沔 原載字子沔  
號東山 休寧人

撰鮑孝子叔和傳 尚綱公之官序

耕讀堂記

夏子都

號黃山樵者

撰山長公墓誌銘

朱境

文公六世孫

撰耕讀堂辭

杜宏

泰寧人

撰縣尹國良公德政頌

黃士實

泰寧人

撰縣尹國良公德政碑

王伯脩

婺源人

撰耕讀堂辭

胡默

號石邱 婺源人

撰耕讀堂後記

滕鉞

婺源人

撰耕讀堂序

張子經

婺源人

賦耕讀堂詩

胡世佐

天台人

撰耕讀堂銘

俞克成

諱振

撰鳳公壙誌 大畝場後記

陳自新

撰芳塢樵隱集序 跋江氏貞節卷

跋宋氏貞節卷

鄭以孝

諱忠 鄭村人

撰山長公墓銘

鄭迪簡

諱汝庭 號西坡  
鄭村人

撰宋氏貞節文 遺澤卷序

程大年

槐塘人

送餞尚綱公之京詩

汪處善

諱積 稠墅人

賦芳塢詩

趙永敬

諱宗榮 巖鎮人

賦得輝公必輝公定齋公壽詩

蘇景元

諱大 休寧人

擬復古軒記

程文實

諱孟 槐塘人

擬定齋公六十壽詩序 復古橋銘

張惟達

諱達 城東人

賦必輝公定齋壽詩

朱士表

諱儀 在城人

擬定齋公行狀 賦棠川四景詩

右歷朝名儒士大夫所撰本宗文翰後來名公贈言更夥  
卷帙浩繁不能悉載名流諱字爵里詩文條目也謹錄舊  
譜所述如此

### 繁昌派字埒

廿六世 廿七世 廿八世 廿九世 三十世 三十一世 三十二世 三十三世

## 方正為良士敦倫道

三十四世 三十五世 三十六世 三十七世 三十八世 三十九世 四十世 四十一世

## 可風尚思光世德咸

四十二世 四十三世 四十四世 四十五世

## 以大其宗

崑山派字序

十八世 十九世 二十世 廿一世 廿二世 廿三世 廿四世 廿五世

孟承從大國家世兆

廿六世 廿七世 廿八世 廿九世 三十世 三十一世 三十二世 三十三世

孔昌懋學昭先德文

三十四世 三十五世 三十六世 三十七世

明起亂祥

刊譜輸金

棠樾

文麟 景交

輸銀拾兩

應高 為陵

輸銀拾兩

忠明 恕昭 忠雲 國生

等輸銀伍兩

泰護公祠

輸銀玖百貳拾兩

一言公派

輸銀拾兩

時業公派

輸銀壹百兩

曰熙 敬存

輸銀伍拾兩

允折 甸一 允全 用廷

輸銀壹百兩

時察 思桓

輸銀貳拾伍兩

嵐 午丹

輸銀伍拾兩

曰增 燼蒼 曰炳 劍華

輸銀貳拾伍兩

曰棟 雨庭

輸銀拾伍兩

貴宗公派

輸銀拾伍兩

良煜公派

輸銀貳拾伍兩

良炤公派

輸銀肆拾兩

滔公派

輸銀拾伍兩

尚禮公派

輸銀壹百肆拾兩起正 丹忱

輸銀叁百兩

起元 文輔

輸銀貳百兩

得善 有餘

輸銀拾兩

學棟 聖宣

輸銀貳百兩

逢仁 聖若

輸銀拾兩

盛棠 秦川

輸銀拾兩

宜淮 台如

輸銀拾兩

宜湘 涵遠

輸銀拾兩

元標 雲表

輸銀拾兩

蜀源

承恩祠公匣輸銀肆百兩

有遵公派

輸銀拾兩

奎順 廷標

輸銀拾兩

濂公派

輸銀拾兩

之傑公派

輸銀拾兩

天生昇友社玉友華

輸銀拾兩

景麟 殿勳

輸銀拾兩

其泰用清如琛非石

輸銀拾兩

光純 景熙

輸銀拾兩

光揆 審端

輸銀貳拾兩

光融 南江

輸銀拾兩

樹煦晴坡樹休整宜

輸銀拾兩

樹宇 衡之

輸銀拾兩

其昉 如李

輸銀貳拾兩

其良 公璧

輸銀拾兩

光甸 治南

輸銀叁百兩

其正 廷表

輸銀拾兩

光猷 立勳

輸銀拾兩

樹昇以昭樹本莊豐

輸銀拾兩

光緯 辰一

輸銀拾兩

光紱 丙符

輸銀拾兩

龍興 詩可

輸銀拾兩

渡公公匣

輸銀叁拾兩

源煥 堯文

輸銀貳拾兩

其璠 聖美

輸銀拾兩

光宗 獻臣

輸銀拾兩

光斗 曜南

輸銀拾兩

光曙 曉亭

輸銀拾兩

光宸 御楓

輸銀拾兩

光高 辰遠

輸銀貳拾兩

光亮 畊南

輸銀貳拾兩

光溥 澤周

輸銀拾兩

光第 于霞

輸銀拾兩

本傑楚良光顯名譽

輸銀拾兩

本善 良贊

輸銀貳拾兩

鉞公公匣

輸銀拾兩

梓佑 天申

輸銀拾兩

玉齡 遐年

輸銀拾兩

鈿公公匣

輸銀拾兩

志昌 啟周

輸銀拾兩

起鳳 舜儀

輸銀拾兩

嘉盛 麗文

輸銀貳拾兩

廷奎 曙南

輸銀拾兩

巖鎮

忠貞祠

輸銀拾兩

尙綾 玉安

輸銀拾兩

元進公派

輸銀貳拾肆兩

鮑氏三族譜牒各派收掌者宜珍藏保守不得妄借與非適派同姓啓冒認之端取辱宗祊特立內外兩號註定收執人名以杜混淆

**鮑譜第壹百肆號 鎮 收執**

議以每年人日各執其譜於聚族所通會毋令失所在後之子孫遞傳收掌聽衆舉擇其賢者授之乾隆丙戌孟冬月吉旦誌

重編棠樾鮑氏三族宗譜終

